

**ASO GAFUA, 29 IANUARI 2018**

*Na nofoia le Nofoa e le Fofoga Fetalai i le itula e 9:00 i le taeao.*

Tatalo.

**SAUNOAGA FAAFEILOAI A LE FOGOGA FETALAI**

**FOFOGA FETALAI:** Ou te faasilasila atu ua toe amatalia nei Tualumaga ma Galuega a le Fono Aoa Fautulafono.

E avea foi leni avanoa ou te faatalofa atu ai ma le agaga faaloalo i le paia ma le mamalu o lau Afioga i le Palemia, le Sui Palemia ma le paia o le Kapeneta ma Minisita Lagolago, ae a Taitaifono o Komiti Faa-Palemene aemaise o sui usufono mamalu uma o leni Palemene i leni taeao fou, malo le soifua, malo le lagi e mama, faafetai le tauatai. Ua tatou faanonomanu i le Atua i leni taeao, e taitaifono, e amata fono, e faaiu fono i leni aso, ina ia manuia ai le tatou galuega. Faamanuia foi le Atua i le faafofoga tapuai mai a Samoa e amata mai i mauga tetele seia oo lava i mauga iti.

**TULAFONO TAU FAAOFI O TEUTEUGA O LE TULAFONO O  
AUAUNAGA FAA-SOIFUA MALOLOINA A LE ATUNUU 2018  
– felafolafoaiga faaauau i luga o le faitauga faalua**

**FOFOGA FETALAI:** E tolopo Tualumaga i le aso Fono talu ai, ua fou amata le saunoaga a le sui usufono mo Vaimauga Sasae.

Ma lou faaloalo ou te tapa lau Afioga i le sui usufono mamalu mo lau saunoaga.

**Afioga SULAMANAIA FETAIAI TAUILILI TUIVASA (Vaimauga Sasae):** Faafetai i lau Afioga i le Fofoga Fetalai mo le avanoa.

O leni taeao ou te tulai lava ma le agaga faaloalo, e tautala foi ma le faaeteete, ou te foi ae ou lilia ma ou gatete, e pei o pisaga o saualii i le To Sua ma le To le Sua i laufanua o Fiame ma Salevalasi. E mafua aisea ona ou fefe ma ou gatete? Ona o lea ua paia ma mamalu le Maota Fono nei o Samoa, aua le afio o lau Afioga i le Taitai o le Malo, lau Afioga i le Palemia aemaise o le afio o le Afioga i le Sui Palemia, paia o le Kapeneta ma Sui Minisita Lagolago. E tuu mai foi i lea itu o le malu, lele ua afifio atu Afioga i alii ma tamaitai sui usufono o le Palemene o Samoa o e na tofia e le Atua e ala i filifiliga a itumalo, nuu ma alaalafaga.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018–felafolafoaiga i luga ole faitauga faalua**

O lenei taeao lau Afioaga i le Fofoga Fetalai e lagona le faagaetia o le loto, ina ua vaai atu sulu o le tino ma lenei Maota, ua tali le Atua i tatalo ua mafai ona e faafoisia mai lou malosia i le taeao lenei, viia le Atua i lenei taeao.

A o le mataupu e fia avatu i lenei itula e fia faaali se manatu o lenei itumalo i le mataupu ua opea nei i le Maota. E muamua ona ou faafeiloai atu foi i le tapuaiga a le atunuu i Auauna Paia a le Atua, o lo o nonomanu i le Atua i so o se fatafaitaulaga e ala i tatalo, anapogi, ma tulivae i le Atua aua se manuia o Samoa ma ona tagata. Ia ou te faatalofa atu foi i le tapuaiga a si ou itumalo pele o Vaimauga Sasae, ia malo le tapuai, malo foi le tatalo, o lo o manuia la outou sui usufono e ala i la outou tapuaiga.

Ae o le a faaali se manatu o lenei itumalo e tusa ai ma le mataupu ua opea nei i le Maota e tusa o le toe tuufaatasia o le Matagaluega o le Soifua Maloloina. Ou te momoli lau faafetai i le Minisita ma le Minisita Lagolago, ona ua mafai ona toe aumai se Tulafono i totonu e faatasia ma tuufaatasia nisi o Matagaluega sa faapena ona tuueseese, maslao o le sui usufono lenei o Vaimauga Sasae sa faapena ona tele se tetee lava i le vaega lenei, ona a silasila lava i le Matagaluega o le MOH, pei o latou ia e molitaina ma vaaia ia galuega a le NHS, pei foi o lea e maua foi i le saunoaga a le Taitaifono o le Komiti o Tupe o lo o faafeagai ma vaai foi i isi itutino isi itutino. E pei foi o lau vaai lena i le Matagaluega o le Soifua Maloloina sa i ai, o le manaia sa i ai le falemai i le tulaga o le tuueseese, e mafai lava ona galulue lava latou i le faatinoina o tulafono ma faiga faavae, ae faatino lava e le NHS le auaunaga faa-soifua maloloina. O lenei la ua toe tuuina mai i totonu o le Maota Fono o Samoa leni tulaga, ia ou te faafetai i le l fefe o lenei Vaega Faaupufai ma le taitaiga o le Malo.

Ou te faafetai foi i le Atua i le sao o le taimi ua filifilia ai au ou te sau ai i totonu o le Palemene o Samoa, e tele suiga fou, ona o le a? Ona o le manuia o Samoa ma ona tagata, aemaise lava le tulaga i le tuuina i totonu o le faavae, o lea ana ou le sau nei i totonu ma ou iloa ai, sa i fafo le tatou Faavae i le faavaa, ae faafetai o lea ua toe tuu i totonu, o lea ua i ai le sui o le Vaimauga Sasae ua toe tuuina i totonu. Ma le isi Matagaluega pei ona i ai le Ofisa o le Loia Sili, o lea foi la ua tuuina mai totonu lea Matagaluega, ou te faafetai i le suiga e le o fefefe e fai. Ona o le a? O le ola ma le soifua maloloina o le atunuu o lo o i le Matagaluega lea.

E avatu sau fautuaga i le suiga lea ua i ai nei le Matagaluega, e tele nisi o saunoaga o le a ou le toe oo i ai i nisi o sui usufono i popolega i le aufaigaluega, ia o le a faapena ona leai ni galuega pe 20 i le 30, ae sili ona popole le sui usufono lenei o Vaimauga Sasae, leaga o tamalii ma faletua o lo o taitaiina le NHS ma le MOH, o tamalii ma faletua e omai i le itumalo, o lou popolega lena. Ae ua le ave lea ma tulaga i le aotelega o le soifua o tagata lautele, o le a faaali i ai se manatu o le itumalo o Vaimauga. O lau vaai i totonu o le falemai pei ua toatele lava tatou i le tulaga o le togafitia, e faatalitali lava se i mamai ona togafitia lea, ua vaivai le tulaga foi lea o le puipua po o le prevention pei ona taua foi e nisi o sui usufono.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua  
Maloloina a le Atunuu 2018–felafolafoaiga i luga ole faitauga faalua**

Ae ou te faafetai i lenei suiga pe a tuuina mai totonu, ina ia faafaigofie ai le faatinoina o auaunaga, o le mea sili lea. E ui lava i Matagaluega uma a le Malo lau Afioga i le Fofoga Fetalai ma le paia o lenei Maota, a o le Matagaluega lenei o le Soifua Maloloina, e tataua ona ave i ai le faamuamua leaga o le ola ma le soifua o le atunuu, o lo o i aao o alii ma tamaitai fomai. E le popole la le sui usufono o Vaimauga Sasae, o le a le tele o le tupe e tuuina i ai, e eseese le latou auaunaga mai Matagaluega uma a le Malo. O lea ua ou tatalo atu ai, se i silasila lava i totogi ia. Ia faamalieina susuga i fomai, le autausoifua ma e galulue i totonu, ia o le vaega lena e tatalo atu ai lenei itumalo. O lea foi ua toe tuufaatasia e tatalo atu ai i lau Afioga i le Minisita le sui usufono o Vaimauga Sasae, a ua toe faaipoipo loa ma toe tuufaatasia, o le a le mea o le a tutoatasi ai le vaega lea e vaaia le Faamamatoto, o le a le mea o le a toe tutoatasi ai? Tuu uma i totonu i i i le falemai. O le mea lena o lea e faapena ona feteeteenai ai auaunaga o le tasi o se faamalu e ave i ai. O le tatalo a le sui usufono o Vaimauga Sasae lau Afioga i le Minisita, tuu i totonu le Faamamatoto ia tasi ai le auaunaga e aumai i luma o le Afioga i le Minisita ma le Pulega faaiuga uma e fai.

O le lagolagoina e le sui usufono, a faapea ua tuufaatasia o le vave ai o le auaunaga, ia viia le Atua, ae a faapea o le tuufaatasia ona o le sefe mai o tupe, pei lava ona ou fai atu, pe fia lava tupe e ave i le Matagaluega lenei o le Soifua Maloloina, o le ola ma le soifua o tagata o lo o i aao, faatasi ai ma le fomai ina ia faamalosi fomai kerisiano. Aua po o le a le o atu o mai ae togafitia e se fomai o lo o ona, ia pei lava o le mea fua, ae a tuu i ai ma le alofa ma le matau ma le tuuina atu i le Atua o a latou auaunaga e le gata i le tuu i ai o vailaau tatalo le fomai tatalo ma le mai, ona alu lelei lea o le tatou faamoemoe.

O le tulaga i teuteuga lea e i ai faapea e i ai i totonu Minisita o le Board lea, e teena e le sui usufono o Vaimauga Sasae. A faapea ua faatino se auaunaga faapea, ua lava le soifua ma lava le aoaoina o tamalii ma tupu o le atunuu e tofia i ai i le Board e faatinoina mai le auaunaga, ona aumai lea i le Kapeneta. Ia o le a ave i o toe saofafai ai outou toe aumai i i toe approve atu e outou? E le lagolagoina e le sui usufono o Vaimauga Sasae la lea tulaga. A faapea ua tatou faatuatuaaina le mamalu o le atunuu e tautuaina lo tatou atunuu, fai mai le latou matafai, avatu i outou aao le Kapeneta, fai la outou faaiuga. E le lagolagoina lo outou saofafai ai i totonu i o le Board lea e filifili ai. Pe tumau pe le tumau, taatitia pea i e ua agavaa. O lea foi e i ai le vaega o le teuteuga lea e faapea mai foi, e tofia le failautusi, le vaega 3, teuteuina le fuaiupu 8, e mafai e le Taitaifono o le komiti faatino ona tofia se failautusi po o se failautusi ia tele ai a tatou tupe. O le a le mea o le a toe tofia ai lea failautusi? O lea foi e faatino mai ai ma le isi vaega lena e i lalo, ae leai se aia tataua e palota ai. Ia pei o le tele ia o suiga fou. O lena e i ai e o lo o agavaa e failautusi le CEO a le Matagaluega po o a tulaga, e faatino nei auaunaga. A tofia foi le isi tagata, ia o le tele lena o le gaogaosa ma le tele o tupe e alu ai ae o la e i ai ia e agavaa.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018–felafolafoaiga i luga ole faitauga faalua**

O le Matagaluega lenei o le Soifua Maloloina lau Afioga, ou te faafetai lava i le Minisita lea o Tina ma Tamaitai, Atinae o Nuu, Afioga ma Agafesootai o lo o faia foi le latou matafaioi o le galulue e faatumama le tatou....aua o i lea e mafua mai ai ona tele le faamai pipisi i totonu o afioaga ma aiga, a ola soifua maloloina la ma mama ni aiga ma ni nuu, e leai ma se nuu e oo i le falemai aua foi o la e.....Ae ou te faafetai i le Minisita ma le CEO ma le Matagaluega o Tina ma Tamaitai, ua taimua i le tulaga o le faamamaina, ia o atu loa i ai ma le Matagaluega o le Soifua Maloloina e faatino nei auaunaga.

Lau Afioga i le Fofoga Fetalai ma le paia o lenei Maota, o le vaai aoao a le sui usufono o Vaimauga Sasae i le tulaga e tatau ona i ai, aua o lea e le o aumaia po o fea e i ai le Matagaluega lenei aua pau le tulaga lea e aumai, se i toe tuufaatasia, a o le gaoioiga ma le toe tuuina o lesi Tulafono, ia o le agai lena i luma, o lona uiga e tele le process o lo o i ai. A o le tatalo, ou te lagolagoina lava le toe tuu mai e toe tuu i lalo o le PSC ina ia mafai ona fuafua atu ai auaunaga ma tulaga faapea, ia ae sii uma i luga totogi, aua o lea ua fai le fuafuaga a le Malo, ua aveese Deputy Commissioner o nisi Matagaluega, ae pau lenei o le Matagaluega ou te tatalo, afai o le a se Structure a le tatou Matagaluega lea o le Soifua Maloloina, ia matuai tuu i luga ia fai ni Deputy po o ni Pule Sili Lagolago e tuuina atu e faatolu pe faafa i latou ia, ona faatoa alu ifo lea i lalo i le system o le Assistant CEO.

Lau Afioga i le Fofoga Fetalai ma le paia o lenei Maota, pei o nai motugaafa na a lenei itumalo, ae sa fai le matou asiasiga a le Komiti lea o le Soifua Maloloina o lo o i ai o lo o matou vaaia le soifua maloloina i afioaga ma nuu i tua, ia o le faafitauli lava e le o lava le aufaigaluega o lo o galulue. O le faataitaiga pei o le Motu i Salafai, ia e tuua e nai teine tausisoifua o latou aiga ia pe omai i le Itu Asau ae o galulue i le isi itu o le motu, ia e tai vaiaso tai lua vaiaso o toesea ma nai aiga. E pei o le tatalo a le sui usufono lenei, pe le mafai ona fai ni faamanuiaga faapena ia i latou i teine tausisoifua, o fomai ia o lo o lava.... O le isi foi tatalo a le sui usufono o Vaimauga Sasae, manaia lau Afioga i le Minisita nai fomai ia o lo o tuuina atu i taimi ia after hours e galulue ai i le falemai tele i Motootua. Ia se i silasila totoa i ai i le tulaga lea aua o lea e maua po o le \$200 i le itula lea e faatino ai, ia e lagona lava le faagaetia pe a o atu nai fomai ia o lo o fesoasoani i le atunuu, ia po o le isi foi feeseeseaiga lea po o ua le fiafia fomai lava ia o la e galulue i le po, o lea ua o atu ia tamaitai ma alii foi o lo o fai le auaunaga matoe latou galulue faatasi, ia a o la e i lalo lava o latou totogi. Ia se i silasila totoa i ai e le faapea e faaleaogaina foi le tautiga o nai vaega ia lea e fai latou private, a o le lava le malosia lea ou te fai atu ai, leaga o lea e galue i lana private i le aso atoa i le 8:00 i le 4:00, ae toe alu atu toe galue, ia se i silasila totoa i ai. A o lau maitau i le tulaga o lo o i ai le falemai, e avatu le faamalo i lau Afioga.

A tele faitioga i le Matagaluega lenei ua sala ina tele, aua foi o le soifua ma le ola o tagata o lo o i le Matagaluega, ou te faafetai foi i le Afioga i le Palemia o le sao o le tofiga o oulua, ua tofia uma ai lava le Minisita o le Soifua Maloloina o lau Afioga o le fomai, toe alu atu ma lau Minisita Lagolago o le fomai faauuina.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018–felafolafoaiga i luga ole faitauga faalua**

Ia faafetai foi i le Atua ua faagaetia lava ua maua e le Minisita Lagolago le faailoga o le fomai e sili ona atamai i le Pasefika ia lea sa tuuina mai i le Matagaluega.

Ia faafetai ai i le Atua i lea tulaga lenei taeao i lou tulai ou te faafetai i lau Afioga i le Afioga i le Fofoga Fetalai, faafetai foi e le mafai ona tuua i lalo ia lau ia faafetai i lenei itula ona o le Sui Fofoga Fetalai sa tulai mai i le tulaga o le taitaiina o le Fono i le vaiaso ua tuanai. Se tau le selu atu i lau Afioga i le Fofoga Fetalai, faafetai ia te oe o lo o e maua se Fofoga Fetalai se tama o lo o e tautua i ai, pau lau tatalo ia lelei oe o lea e te see i luga o le Nofoa e faatautaia le Nofoa o Samoa e toe see mai i lalo. Ae talofa e i nai Minisita Lagolago e le mafai ona see i luga pe a alu ese le Minisita.

O lenei taeao i lau Afioga i le Fofoga Fetalai, ia ou te faafetai i le taitaiga o le Fono, amata usu foi ma ua lauga mua Tuisamau po o Saleupolu i lenei taeao, ia faafetai Samoa i lau tapuaiga. Faafetai o le a foi se maea ua paopapa i le tautalaga a Tuisamau po o Saleupolu i lenei taeao, ia malu ave i puega i finagalo o lau Afioga aemaise foi lena itu o le Maota, ia ua manaia lava i lenei taeao, manaia ua atoa lelei se vaiaso ma toe alu atu ma le isi vaiaso, ia o le auga lena o le sui usufono o Vaimauga ia tele ni aso e fono ai, ia faafofoga le atunuu i manaoga o lo o tatou faia nei, ia manuia le tou faafoega o le atunuu lea ia ma le tuualalo o lenei itu, soifua.

**FOFOGA FETALAI:** Malo faafetai, masalo ua uma sui usufono e saunoa i lenei Tulafono aua o le Teuteuga foi ua maea ona fai ai le tatou semina mo le faalauiloa o le mafuaaga autu ua toe faapena ona toe tuufaatasia ai ma toe tuuina mai le Teuteuga o lenei Tulafono.

E maitau atu i le tulai mai o le sui usufono, o Gagaifomauga Nu.3, tulai mai lau Afioga i le sui usufono.

**Susuga Hon LAAULI LEUATEA POLATAIVAO FOSSIE SCHMIDT (Gagaifomauga Nu.3):** Faafetai i lau Afioga i le Fofoga Fetalai, ua maua se avanoa o lenei itumalo aua lenei Tulafono taua.

E manatu ua togomalama nai Mataniufeagaimaleata, Malaeola ma Nafoga, Faleu ma Utuaagiagi, aua o manuia na o Samoa o lea ua tatou pale ma ula ai i lenei taeao manuia. O lena ua faaoo tau le faafetai e Tuisamau, i le tatou fesilafai i lenei taeao fou ma lau Afioga i le Fofoga Fetalai, viia le Atua.

Ae le i oo se lagona e faatalofa atu i le tapuaiga a le tatou atunuu. i ona tulaga faalupe a o fufou lo tatou sa i le amataina o lenei vaiaso fou. E faatalofa atu foi i le paia o le Maota, i le Taitai o le Malo ma le Kapeneta ia faapea usufono uma o le Fonousu a Samoa.

E faaaogaina lenei avanoa lau Afioga i le Fofoga Fetalai, ou te momoli atu ai se faamaisega ona o se faalavelave faafuasei na tupu i le Aso Toonai. E molimoli atu ai faamafanafanaga i aiga ma le mamalu uma o le atunuu na aafia i lenei faalavelave. O faalavelave tatou te le taupulea, o faalavelave foi tatou te le mailoa leaga sa tatou momoe ma manu, ae sau lava mala e atiae.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua  
Maloloina a le Atunuu 2018–felafolafoaiga i luga ole faitauga faalua**

Faafetai i le Atua tatou te lagona ai ma matimati ai le tatou faigamalaga ina ia aua ne i toe tutupu faalavelave faapenei. Ae faafetai ua toa i aupeau ma maua le agaga o le faamafanafana ma le agaga o le faamalosiau ma tatou tatalo, ina ia se nofoaga mau o i latou na aafia i lenei faalavelave.

E timata ai le upega i le mamalu o le atunuu o e o lo o feoi i alatetele uma, ia faaeteete ina ia malu pea le atunuu e ala i le tutupu mai o faalavelave tatou te le manaomia.

Lau Tofa Fatialofa, lau Tofa Auelua, lau Afioga i le Palemia. O le a faia ia lou leo e fai ma fofoga taumomoli o lenei aiga, i le afio o le Sao o le Afioga ia Puletiu Atoa, ma le Afioga ia Tupua. Ua louloua le aso ua le logona so matou leo, a o le faaaloalo maua luga na faatino ai ou tiute e ala i le tausiga o le tatou itumalo, o le a le natia ifo i fatu alavai ona o tiute e tausi ai le mamalu ma le paia o le itumalo, e ala i lau faamalumalu ma le faapaiaina o le faafotutupu ma le faafotu o le vaaalii o le mamalu o le tatou itumalo.

E momoli ai le agaga faafetai tele ona ua atoa tupe i le fala ma le tino o le tama na moe i le ana, ona o tu ma aga e tatou te masani ai e tausi ai le tatou vanonofo, o le vatapuia. O le matou tatalo, ia maua pea le soifua manuia aua le tauaveina o le mamalu o le tatou itumalo, i le afio aua paia i Aiga, Afio o Tupuola ma le matua ia Tago, mamalu o le Usoalii Popo ma Talimao ma lea itu o le tatou nuu. Afio foi Faaulutoi, mamalu o le Usoalii Sua Lealaimalae, Alo o le Tuiatua, Alo o Mataafa ma Alo o Malietoa, alaalatai oulua tama Punefu, tu launiu Atua tootoo o lalogafuafua, fetu pupula e folau ai lo tatou nuu o Lepa, fetalaiga ia Malielegaoi ma le Faleatua, mamalu foi aua Maopu Taulagi, Puletiu Atoa ma Falenaipupu, Tupua o le Aloalii, Sagapolutele, Sagale ma le Sogimaletavai ma upu i lea itu o le vai.

Ia le tatou itumalo, e pei lava o le upu o le aso, o so matou ola e fia o atu e tautua aua le va faafeagai ai i le tausiga o upu aua lea itu o le tatou aiga. O le tapuaiga a lou itumalo sa Tupua ma sa Malietoa ma aiga, malo tatalo o lea ua taunuu le faamoemoe. O lea lava e ao manogi aua le tapuaiga aua sa Tupua tainane Aiga o Mavaega. O la outou faaaloalo na to ia te au aua le Fuiavailili, o lea foi ua faaaloalo mai lea itu o le aiga, ua sooula ai le fala, Tupua Fuiavailili ae tausi vaatele oe aiga sa Tupua. Faafetai atu ai i le tatalo, faafetai foi i Susuga i Faafeagaiga i le fesoasoani mai, faafetai atu foi i nisi o le Maota lau Afioga Safotulafai, ia faatutumu e le Atua mea ua faagaogaoina.

Lau Afioga i le Fofoga Fetalai, e fia fai se manatu i le Teuteuga o lenei Tulafono o le Soifua Maloloina, o se Teuteuga e sili ona taua ua taunuu mai i le Maota Fono lenei ona o lea tatou te vaai pea i tu ma aga a le soifuaga, e tatou te le iloa le mea e tupu taeao.

Ua tatou molimauina lenei faalavelave na tulai mai i le Aso Toonai, ia e leai lava se isi e faapitoaugafa. E muamua lava sulu i le maota gasegase o sulufaiga o le atunuu. O lea tatou te tomanatu ai ma manatunatu pea i le taua o le tapue, matimati, fatufatu, faufau o le Matagaluega lenei. Ma e le o se Matagaluega faatoa fai ananafi, ua loa aso talu mai le tatou uluai faavae na filifili ai ia i ai se Matagaluega faapea ia tulai aua le tausiga o le soifua maloloina, aemaise ia le puipuiga o le atunuu i mea uma.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua  
Maloloina a le Atunuu 2018–felafolafoaiga i luga ole faitauga faalua**

E le gata i faamai pipisi, faamai i tulaga eseese e tupu mai lea taimi suiga o le tatou olaga ma le tau, a o faalavelave tatou te le maitauina.

E momoli ai le lagolago a lenei itumalo lau Afioga i le Minisita, ona o le faatulai mai i lau silasila ma lau tagatagai mataalia e faatonutonufolau ai le Matagaluega i le mea e tatau ona i ai. E le i leva atu sa tomanatu ai nisi o Minisita sa seei i totonu o le Matagaluega, e tatau ona fai le mea lea o le faavalavala, e tofu le tagata ma lana faalau e toso, e tofu le tagata ma lana mea e fai, e le laitiiti lea galuega lau Afioga sa tele ni consultation, sa tele ni talanoaga, sa tele ni fetufaaiga, sa tele foi ma anoanoai lo tatou taimi na alu ai. Peitai o lea foi ua oo mai i lenei vaitaimi, ia e faapena le soifuaga.

Na pau lava lea o le tuualalo lau Afioga i le Fofoga Fetalai, lau Afioga i le Minisita, ia silasila totoa lau Afioga i le Minisita i le faatulagana fou lea o le a fai. E le aoaia e Laupua Tamafaiga, leaga o lea ua tatou toe back to square one. O lea ua tatou toe foi i le mea na tatou amata mai ai i le amataina o le Matagaluega. Atonu foi tatou te le o iloa le mea o i luma atu, atonu foi tatou te le ma iloa po o le a le isi mea o le a tulai mai i le lumanai. Ae o le faatuatuga, leaga o lau Afioga lea e te seei tonu lava i le Matagaluega.

O mea uma o inisi, o sekone, o itula, o lau lea matafaioi na tofia ai oe e le Malo e te silasila i itu uma. O lea ua faaleo atu atugaluga o sui usufono mamalu, e leai lava se manatu e le taua lau Afioga. O penefiti, o le aafiaga o aiga, o le taimi, o aso o tupe faalua, o lea ua folasia i malae. E taua mai i ao seia oo i ona iu, mai le Faauluuluga o le Matagaluega seia oo lava i le tagata e sili ona mauualo lana galuega, o le faamamafa lena o le itumalo lenei lau Afioga. E taua le galulue faatasi e pei ona saunoa atu nisi sui usufono, aua e ta te fiu e fau, sui ma teuteu le Tulafono, a le faatinoa, ia e ae fua le faiva lau Afioga i le Minisita.

O lea ua tatou foi mai i vaeveaga e gata ai vaeveaga e tofu le faalau ma le Pule, ma lana aufaigaluega e fau ai le falemai ia lelei. O lea foi ua molimauina ua tulai se falemai numera tasi i totonu o le Pasefika lenei, o lea ua tatou vaavaai i ai. O isi taimi a e ulufale i le falemai, ua e mafaufau e te le o i Samoa, what a beautiful hospital, atoa mea uma, lelei mea uma, selau pasene mea uma. A o le faatulai mai o ni suiga faapea, e ta te toe manatu ai, ai o i ai se mea o faaletonu ua mafai ai ona toe tuu faatasi nei suiga. E ui o lea lau Afioga i le Minisita, o lena i ina le tofa ma le uta, ua lava taoso e pei ona saunoa atu le sui usufono o Tuisamau, o lena e i ina le faautautaga oo, e le gata i lau Afioga a o lau Minisita Lagolago. O oulua uma lava o tausisoifua faamauiina, Registered Official Doctors e vaaia ma puipua le tamaoiga o le atunuu, ma ia oulua seu silasila foi i isi o le aufaigaluega e mafai ona avatu le tuualalo ma avatu le fautuaga ina ia sao ma lelei le faatonutonuina o le Matagaluega.

O le manatu autu o lenei itumalo, o le vaa nofoa tolu lava lea e pei ona ou avatu i lau lauga i le Tala o le Tupe, o le Malo ma le Matagaluega o le Soifua Maloloina, o le pule mamalu a alii ma faipule, ma le faamalumaluga a ekalesia. O i ina e fusi ai le fau o Malo e ave ai le fesoasoani a alii ma faipule i mea nei o falemai.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018–felafolafoaiga i luga ole faitauga faalua**

**FOFOGA FETALAI:** Ua toe lua minute o le sui usufono.

**Susuga Hon LAAULI LEUATEA POLATAIVAO FOSSIE SCHMIDT:**

O falemai uma i Samoa e manaomia le lagolagosua a le pule mamalu a alii ma faipule, e taua le fesoasoani atu i le Matagaluega, ni mea e le o maua, ia faaatoa e alii ma faipule ma o ifo e lagolago le galuega lea o lo o fai. O le matou falemai lea i Safotu, ia na avatu le fesoasoani a le Malo faafetai i lea vaitaimi o tulai le Afioga ia Gatoloai i le Minisita o le Soifua Maloloina. O le utiuti o le tatou faasoa o le ata lava na fai ai Aleipata o le ata foi lena na fai ia matou i Savaii, matou te le i tagisa, aua na matou iloa e fua i le mea e fai i le tupe maua a lo tatou Malo. Na matou agai pea lea i le Minisita matou fai i ai, lau Afioga i le Minisita, e le lava potu, o le itumalo e tele. E mai le matou nuu o Aopo e tau i le Itu o Tane atoa e le lava potu. O le tali a le Minisita, malilie, onosai se i i ai se taimi. Ia, ona saunoa mai lea o Tuiloa, o se tasi foi o tulatoa o le tatou itumalo, Laauli ma Soalo, o e faaoga lua mafaufau i le mea lea. Ona talai ai lea o le matou itumalo fai le matou sailiga seleni matou te o e fesoasoani i le Malo e fau potu malolo. E 20 moega faaopoopo na fai e le itumalo, Gagaifomauga Nu.1, Gagaifomauga Nu.2 ma Gagaifomauga Nu.3.

O le atoaga lena na oo atu i lau Afioga i le Minisita e faamalamalama, o le matou sao lena e fesoasoani atu ai i le Matagaluega. Ua a nei? Ua mapu si o matou itumalo lau Afioga. O le agaga lena lau Afioga i le Minisita e taua ai le galulue faatasi o le Matagaluega ma le pule mamalu a alii ma faipule, o ifo uma tina o le itumalo e leoleo le tatou falemai.

**FOFOGA FETALAI:** Malo. Ua maea le taimi o le sui usufono.

**Susuga Hon LAAULI LEUATEA POLATAIVAO FOSSIE SCHMIDT:**

O le tulaga lena lau Afioga i le Fofoga Fetalai e faaali tino ai le lagona i le taua o le galulue faatasi o le tatou Malo ma le pule mamalu a alii ma faipule ina ia lagolagosua ina ia manuia le Matagaluega.

Ia maua le soifua manuia e lau Afioga i le Fofoga Fetalai aemaise le Fonousu i lenei taeao ma le tapuaiga a Samoa. Ia soifua ma ia manuia.

**FOFOGA FETALAI:** Malo faafetai, malo malele faa-toeaina. Ia, talu ai ona o lea ua maea tatou sui usufono sa tulai mai e fia saunoa.

Ia manatua foi o lenei Tulafono Tau Faaofi ua uma ona faaali i ai outou finagalo i le taimi o le semina, ia na ona faamanatu atu le itu lea. Ae lelei ona fautuaina e le Fofoga Fetalai, e faigata le tatou avafatafata.

Tulai maia e faapupuu mai o oulua finagalo, toe toalua sui usufono, faapupuu mai finagalo ona o lena tou te silafia le tatou Tulafono Tau Faaofi na tuuina mai le faaaliga ina ia faapena ona uunaia ina ia vave ona faatino a tatou feau ma galuega e le Minisita mo le Soifua Maloloina.

Tulai mai le sui usufono mo Aiga i le Tai, faapupuu mai lou finagalo.



29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua  
Maloloina a le Atunuu 2018–felafolafoaiga i luga ole faitauga faalua**

**Susuga MULIPOLA LEIATAUA LAKI (Aiga i le Tai):** Faafetai i lau Afioga i le Fofoga Fetalai mo lou avanoa. E moni lava le fofoga o lau Afioga, ae peitai, e le mafai ona natia i tua se lagona e fia faaali i lenei taeao. O le taimi ma lona faafitauli, o le taimi foi ma mea e tutupu ai. Peitai o le ala lea o le taulagalaga o se manatu i lenei taeao.

Ona ou manatu lea o le a ou le toe asaina filifili o le vaosa pe ou te toe fagotaina le ogasami ua maea ona aloina, o lea ua maea ona paepaeulufanua le taeao ma le aso, aua le faafogafoga mai a Samoa o tapuai, ae a le paia o le Maota lea. A o lenei taeao, e momoli atu le agaga faafetai i lau Afioga, e ui lava ina tau saili atu se avanoa, peitai, o lea ua matala ia sega se finagalo o lau Afioga i le Fofoga Fetalai.

E le mafai foi ona faaitiitia le agaga faafetai i le Atua aua o lea ua tatou feiloai i magafetausoifua o lea ua maua i le vaai ua toe faafoisia le malosi o lau Afioga i le Fofoga Fetalai, o lea ua tali le Atua i tatalo sa tuuina atu ina ia faafoisia le malosi o lau Afioga.

A o lenei taeao, ae ou te le i agai i le mataupu pei ona folasia i lumamea, e avea lenei avanoa e molimoli atu ai faamaisega i le paia i si ou itumalo aemaise le afioaga o faafogafoga mai. Le paia i Aiga e lua, Ati ma Lautolo, faapea Sau ma Sauma ma Usoalii faafeagai. Le paia i le Toafa o Alii ma le Toalua o Tulafale, Lututu ma le Alo o le Malietoa ma le mamalu i le Falemanono. E momoe a ma manu ae sau mala e atiai, o faalavelave tutupu faafuasei ua afaina ai si o tatou itumalo. E avatu le faamaisega, ia maua le mafanafana i le paia i Aiga ma le mamalu o lou itumalo, ona o le valaau paia a le Atua i nisi o aiga. O le mea moni, e leai lava se isi e fuafuaina mea tutupu i le soifuaga ma le ola nei. Ae pei lava ona vavamamao o le lagi ma le lalolagi, e faapena le Silisili Ese o le finagalo o le Atua ma manatu o le tagata. Tatou tatalo ia i le Atua ina ia maua le mafanafana sili i o tatou loto ma faamoemoe.

A o se avanoa foi e molimoli atu ai le agaga faafetai tele i lau Afioga i le Minisita, le Minisita Lagolago ma le paia o le Matagaluega ma auaunaga a le soifua maloloina, ona o le tali mai i lea faalavelave. E vaaia ma maitauina le mataalia o susuga i alii ma tamaitai fomaina na vave ai ona toe faafoisia le malosi o le toatele o i latou sa maitauina le afaina i lenei faalavelave.

E le mafai foi ona alu loa se faamatalaga, ae asuasua atu vaimalu i puega i le paia i le Maota aemaise le faafogafoga a Samoa. Aua o upu lava e masani ai a tuia lou aao se i tulou, e logo i lou tino. Afai ua sala le siaga, e faamalulu atu, o le faatamala o mea nei o avetaavale.

A o le mataupu e pei ona folasia i lenei taeao, e manatu lau Afioga o se mataupu ua sili ona taua. Ua tatou talanoa i le soifua ma le ola o tatou tagata. E tasi lenei o vaega sa tulimatai i le vaai a le sui usufono mo Aiga i le Tai. O lea ua maea ou fale komiti e lua, o le vaai mamao lea ina ia toe lalaga mai tulaga i komiti tumama, ina ia mafai e lea auaunaga ona toe faaola mai le faiga lea o le avatu i tua o a tatou first aid kit foi lea sa masani ona avatu i tua o nai vaipou ma nai vaimanua ma tulaga i fusiga, o isi ia mea o lo o tumutumu ai le falemai.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018–felafolafoaiga i luga ole faitauga faalua**

Aua o ia onapo, e tiga lava ona fealuai le toaina ma le olomatua o se tama ma se teineitiiti ma se matua manua lava, ia pei sa le amanaia tele le tulaga i le auaunaga a le falemai, sa fofu lava i fofu masani o nai laulaau, o nai fuefuesina ma le fuesaina. Peitai o le suiga i taumafa i nei onapo, ua faasolo foi ina le gafatia e nai laulaau i nei ona po faalenatura le malolosi o mai ua aafia ai le soifua ma le ola.

O le mea moni, o isi ia mea o lo o tumutumu ai le falemai. Ae afai e fanau mai i le faaipoipoga lea le toe faaolaina mai o auaunaga, ia ou te talitonu o lo o i ina i lau Afioga i le Minisita ma le uta ae toe tatala mai ma toe faaolaola mai komiti tumama i nuu ma afioaga aua le faatinoina o auaunaga ia, aua ua oo lava i le tamaitiiti na o se tamai maosia i le vae po o le lima se i tulou, ua tutu lava i kiu i le falemai ma poloka ai le auaunaga. Ae o mea ia e mafai ona faatino i tua i komiti tumama pei ona amata mai ai.

Lau Afioga afai foi e fanau mai i le faaipoipoga lea le toe faaolaola ma le toe fausia o le fale komiti i lou motu i Manonotai, ia, o se faiga ua sili ona matagofie ma manaia aua sa i ai le falemai sa tu ogatotonu i lou motu i Manono sa tua i ai aua e le faigofie le tausaili o le vaa i le tuneva o le po. A taunuu i uta e toe saili se taavale, o lona uiga, e pei lava e tataua ona lua ni ola e maua e tagata Manonotai.

Lau Afioga i le Fofoga Fetalai, e tauala atu i lau Afioga le tatalo e ala i lenei faaipoipoga, e ese le manaia pe a tusa ai ma se tofa i lau Afioga aua ua toetoe a 2,000 le faitauaofai o tagata palota o lou motu. O lona uiga a tuu i ai ma le lautele, o lona uiga ua faitau i le 3,000, ua tele foi nei soifua o lo o saisaitia ona o le tulaga i le faigata o feoaiga pe a aafia i mai o le tino.

**FOFOGA FETALAI:** Toe lua minute o le sui usufono.

**Susuga MULIPOLA LEIATAUA LAKI:** Faafetai i lau Afioga, o lea o le a faauma atu. Ia ona faaiu ai lea o se manatu, leaga e alo lava le foe ae manumanu ne i pisi. Lau Afioga i le Fofoga Fetalai, avea foi lenei avanoa e momoli atu ai le faafetai tele i lou itumalo e ala i tapuaiga ma talotaloga. E i ai lava le naunautaiga, e manuia lava faiva, maua sou manatu ona o la outou tatalo ma le tapuaiga. E le o moe lava lo outou sui, o lea lava e minoi lava, ioe. A le minoi atu lava le Malo, a o faiga uma a lea ua outou silasila i ai, toetiiti foi uma isi galuega ia, e ui lava e tauala mai fesoasoani mai fafo, a o faiga paaga lava a le Malo ma atunuu tetele e mafua ai.

Faamalo le tapuai, faamalo le tatalo, tau ia ina agalelei le Atua faatuatuanai ne i faalavelave ua tutupu mai ae maua le laolao mo le agai i luma o le tatou itumalo. Manuia lau Afioga i le Fofoga Fetalai faapea le Palemia ma le Kapeneta ma le faigamalo, manuia Faaululuga o Matagaluega ma Faalapopotoga Tumaoti. Manuia le Fono. Soifua.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua  
Maloloina a le Atunuu 2018–felafolafoaiga i luga ole faitauga faalua**

**FOFOGA FETALAI:** Malo faafetai. A o le i tuuina atu le avanoa mulimuli lea e fia saunoa mo lenei Tulafono Tau Faaofi Toe Teuteu, e fautua atu e ala i le Nofoa, alolofa sui usufono mamalu e faaoga tatau o tatou avanoa, leaga o lea tatou te i le tulaga e le o le tulitamoe o tatou galuega, ae tatou te o i le Tulafono Tau Faaofi e pei ona tuuina mai. O lenei Tulafono Tau Faaofi e manaomia vave e faatino ai gaoioiga, ma faatino ai mea o lo o finagalo i ai itumalo e ala i fnagalo o sui usufono o le Palemene e pei ona faaalua. Ae leai se lagona e teena ai lo outou finagalo faamaise ona o le faalavelave na tulai mai i lena vaiaso, o lena ua outou silafia aua tatou te momoe ma manu e le fati ae sau mala e atiai. Faamolemole saunoa sao agai le tatou Tulafono Tau Faaofi. O lo o i le paoa foi o le Fofoga Fetalai le faamuta o le saunoaga pe afai e tulai mai sui usufono ae tagatasi saunoaga. Ioe. E maumau la le taimi. Ioe.

Tulai mai le sui usufono mo Faasaleleaga Nu.4. Vaai pe le tagatasi ma isi sui usufono ae o le a faamuta foi lou avanoa.

**Afioga PESETA VAIFOU TEVAGAENA (Faasaleleaga Nu.4):** E muamua lava ona momoli le faamalo ma le faafetai i lau Afioga i le Fofoga Fetalai. O le agaga fiafia o lenei sui usufono, o lea ua vaavaai atu, ua maua lava le malosia ma le soifua maloloina o lau Afioga i le Fofoga Fetalai. E ui lava foi ina tatou le feiloai i le tele o aso o lea foi vaiaso, ae sa tatalo lava ia vaavaai atu o e afio mai i lenei taeao. O le mea lea e ave ai le faamalo ma le faafetai i lau Afioga.

E momoli foi le faamalo ma le faafeiloai atu i lau Afioga i le Palemia, ua maua le soifua laulelei e le Afioga i le Sui Palemia ma le mamalu o le Kapeneta, faapea foi i sui usufono mamalu uma o lenei Maota. I le tapuaiga foi a Ofisa Sili o Pulega ma Pule Sili, le aufaigaluega a le Ofisa o le Fono ma le Failautusi, aemaise foi le tapuaiga a si o tatou atunuu.

Ona manatu lea i sa ma faigata o lenei Palemene, o le a taoto ae o le a tuusao atu ia le manatu o lenei itumalo, e faimea faalogo foi i lau Afioga i le Fofoga Fetalai. Lau Afioga, e ese le faatauinaina e lou itumalo o lenei suiga po o lenei foi Teuteuga ua vaavaai atu ona o lenei manulauti, aua sa ou faalogologo ma le totoa i le tele foi o nisi o saunoaga a sui usufono mamalu ona o le suiga ua i ai nei. Sa ou manatu foi, ailoga a tulai mai ia nei suiga pei ua mafua ai ona le atoatoa lenei manulauti, aua foi pei foi ona saunoa nisi o sui usufono mamalu, ina ua tofia foi lau Afioga i le Minisita faapea foi le Minisita Lagolago, sa lagona lava le fiafia lagona foi le faafetai, aua o la oulua foi matafaioi o le tomai ma le meaalofa a le Atua faafomai.

E faapea foi i le afioga i le Alii Pule o se tasi foi o fomai lauiloa, e oo foi i le GM lea o lo o i ai nei, o se tasi foi o soifua maloloina po o le RN ua lava foi le tomai. Sa i ai lava la le talitonuga i lou sui usufono, ailoga a tulai mai ia se tulaga faapenei. E mafua aisea? Aua foi ua matua matagofie ia nei tofiga ua i ai, ae ina ua maitai mai nei tulaga ua le ausia e le Matagaluega le manulauti.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018–felafolafoaiga i luga ole faitauga faalua**

Ona ou manatua ai lea o ia taimi na valaau mai ai le Afioga i le Palemia ia te au ou te sau i le tausaga e 2016, sau e te alu i uta e te alu e momoli le faafetai i lo tatou Malo, ona o le valaaulia a le Sosaiete o Tamaitai Tausisoifua o le fono faaiu foi lea faaletausaga, o lea la na ou malaga ai i le aso lea ma sa matou i ai ma le Afioga i le Minisita, faapea foi ma le Afioga i le Minisita Lagolago. Peitai la, ua aumai ai i lea taimi se tasi o tina matua e le i leva ona tuua le malo le afioga i le Peresetene ia Faamanatu. Na saunoa mai lenei tina, Peseta e i ai lava si talosaga lea e fia tuuina atu e molimoli i le Afioga i le Palemia, o le faafetai i le Afioga i le Palemia ma le Malo. Lua, o le matou hall lea o Tamaitai Tausisoifua e moomia se fesoasoani. Lona tolu, o le structure la lea pei ona i ai ia teuteuga ia pei o lea e tau atagia mai i le taeao nei. Ua uma le mafutaga foi i lena aso ua tuumuli mai le Afioga i le Minisita faapea foi le Minisita Lagolago, ae ua oo mai le afioga i le Tamaitai Peresetene ma faapea mai, Peseta e i ai lava le mea ou te fia talanoa atu ai, ae faafetai ua tuumuli le Minisita ma le Minisita Lagolago, ou fai atu loa i le tina lea, ia lelei o lea ua maua le avanoa e aumai uma lava mea ia e tutupu, po o a ni mea o faaletonu i le Matagaluega. Ae fai mai le tina, o le structure lea ua avatu e matou te moomia le toe siitia o totogi o tausisoifua. Ona ou fai atu lea, aisea le mafuaaga? Ae fai mai le Peresetene, silasila foi i le mea lea e tupu i le Matagaluega, ua faatino e tausisoifua i nuu i tua ma afioaga i tua aemaise foi o le Motu i Salafai o lea e faatino e tausisoifua ia auaunaga. E mafua aisea? Ia ona o le utiuti lava o tatou fomai. O galuega faafomai, o lea ua faatino i le taimi nei e tamaitai tausisoifua. O le taua la lea o le taimi na tofia ai au e le Afioga i le Palemia, ua aumai ai le feau lea, pei ua vaai atu i lenei teuteuga....

**FOFOGA FETALAI:** Tulai mai le sui usufono mo Vaimauga Sasae.

**Afioga Sulamanaia Fetaiai Tauilili Tuivasa:** Lau Afioga i le Fofoga Fetalai, ou te le faalavelave i le saunoaga matagofie a le sui usufono. E pau lava le mea e fia fesoasoani atu ai i le sui usufono, po o le a le tulaga tofi lea na tofia ai oe e le Palemia, aua e maitau atu o oe o le Sui Minisita Lagolago. Pe na e alu i lou Minisita Lagolago, pe na e alu o oe o le Sui Palemia e sui ai le Palemia? E fia malamalama ai le sui usufono, aua o lea ua faalogologo atu i lau saunoaga, ia o mea ia tau i luga o le Palemia ma luga o Minisita ia ua e saunoa ai. E fia malamalama ai le sui usufono po o le a lona faalupega lea na alu ai?

**FOFOGA FETALAI::** Faatoa ou faalogo lea i se saunoaga sili ona manaia o le saunoaga a le Sui Minisita. Se i tulai mai e faaauau, aua e te amanaia pe afai e le maua se tali o le mea lea, saunoa mai.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua  
Maloloina a le Atunuu 2018–felafolafoaiga i luga ole faitauga faalua**

**Afioga PESETA VAIFOU TEVAGAENA:** Lau Afioga i le Fofoga Fetalai, e faigata ona tuu le tali isi ou uso a sui usufono lau Afioga i le Fofoga Fetalai. Mo le silafia e si ou a sui usufono, o au e le o se Sui Minisita o au o le Palemia Lagolago, a leai foi le Palemia ia o au lava e Palemia. E leai lava se isi e oo mai i le nofoa lea, e uma loa Tuilaepa o au, masalo o le tali lea e te fia maua maia lau Afioga, ae o le a faaauau lau lauga faamolemole.

**FOFOGA FETALAI:** Malo. Pau o le mea o le aveese o faamaumauga o upu ia mai le tatou fono, ae faaauau le saunoaga a le sui usufono o lena e lelei, e le o toe tele foi sou taimi.

**Afioga PESETA VAIFOU TEVAGAENA:** Sa ou faalogologo lava lea i le feau taua lea sa aumai e lenei tina, ma sa ou asia loa la ou alu loa i Savaii, o lea ou te faamaonia ai le saunoaga a le sui usufono mai Safotulafai i le toatasi o le fomai isi o matou itumalo mai le falemai i Tuasivi, a o nuu i tua, e moni lava lau Afioga i le Fofoga Fetalai, o fomai ia e vaaia o tausisoifua. Sa ou fesiligia foi la ia tamaitai tausisoifua e uiga i gasegase ia ni mai foi nei ua faigata togafitiga, ae fai mai le tali, e fesootai mai i latou i Motootua ona avatu ai lea o le faatonuga lea, ua faatino ai galuega faafomai. Ona ou manatu lea o se tulaga e tatau pea ona avatu, leaga e tasi lenei vaega e taua lenei i teuteuga. Afai la o lea ua tagisa mai lenei tina e toe sii totogi o tausisoifua, atonu o le mafuaaga lea, aua foi o lea ua galue le tausisoifua e na te tauavea ia galuega faafomai. O le mea lea lau Afioga i le Minisita faapea foi Afioga i Minisita Lagolago, ia e leai e le o se tala e avane ai, a o se talanoa atu i lea tulaga.

O se isi tulaga lau Afioga aua pei o lea e faasea sui usufono mamalu, o le tele o gasegase a oo ina pisi ia ua faatumulia le maota ae ua leai ni fomai. I lau vaai ma lau maitau i le ofisa lea ma te galulue ai i tai, ia tulou lava lau Afioga i le Minisita, i lau vaai pe mata e le matagofie ona toe see mai le Ofisa o le Minisita i Motootua, aua foi o le a faigofie ai fesootaiga nei, ua mamao tele tai ina ia maua ai pea ia tulaga e aoga ai minute ma taimi uma o fomai i mea tau faalavelave a o lea lava e i ai le fomai ma lona ofisa i uta, a o le tulaga lea e i ai, ia e umi le taimi o tau oo atu fomai foi e fia vaai i lau Afioga a o lea e tiai ai i le falemai, pei la o se tulaga lea lau Afioga.

Lau Afioga sina minute lava e tasi leaga e faigata o le faafetai. O le faafetai o lea e le o afio mai le Minisita o Galuega, Felauaiga ma Atinae Esee. Na o se faafetai lava lau Afioga pei foi o le finagalo lea na avatu e Safotulafai, na ona sina faatafatafa atu lava, o lau faafetai, o le faafetai a le nuu o si ou itumalo ona o le auala o lea ua maea, pau lava lea lau Afioga, o le faafetai lau Afioga i le Minisita o Galuega afai o e faafofoga mai, e momoli atu lau faafetai i lau Afioga ma le Matagaluega aemaise foi le Faauluuluga o si ou uso i Savaii ia Mataafa, ma le mea lava lea e tasi lau Afioga ona o lea ua tulai mai le faalavelave lea i le Aso Toonai.

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua  
Maloloina a le Atunuu 2018 – iloiloga auiliili**

O se fautuaga po o se talosaga ona o lea sa talanoaina foi i lea vaiaso ua tuanai, ona o le auala lea i Vaitele agai i Mulifanua, lau Afioga e manaomia lava le tolu lane, e moni o lea e le i aumaia le plan semeamanu o lea ua maua lou avanoa e moomia lava le tolu lane, ona o faafitauli nei o lea ua faatupulaia le tele o taavale e aumai. O le isi foi faafitauli o mea ia o taavale maliu, a oo ina tuai ona taunuu le taavale maliu poloka uma malaga, e le gata o le malae vaalele a o le uafu. Lau Afioga afai o faafofoga mai le Minisita o Galuega, a o se fautuaga, e manaia pe fai auauai pei o le mea lea e i ai i Vaitele, ae ia faaoga la ia ta Amerika lea o le asphalt, pe latu i lenei tausaga le tele o vaa ia uma lenei tausaga, e uma ane le Paeaiga, ia ua manaia ma matagofie.

Lau Afioga le tapuaiga a si ou itumalo, e momoli atu le faamalo ma le faafetai. Afai foi o tou faafofoga mai o leotele atu le sui usufono, e faapena, e pei lava ona ou fai atu i lau lauga o le a faamaea lenei Paeaiga, afai lava e tatala mai e le Atua le nofoa mo au e seei ai i le nofoa o lo tatou itumalo, e faapena. O lo o lototele lava lo outou sui usufono i la outou tapuaiga. O le mea lea lo tatou itumalo, e momoli atu le faamalo i lou nuu pele i Puapua ma si ou nuu pele ia Asaga ma Lano, faamalo tapuai. O nisi o galuega o lo o moomia e lo tatou itumalo, ia tatou tapuai ia i lenei tausaga.

O le mea lea faafetai i lau Afioga i le Fofoga Fetalai mo le avanoa, aemaise le tapuaiga a le Palemene, soifua ma ia manuia.

**FOFOGA FETALAI:** Malo faafetai. Ua logo i tino matagilelei e tusa ai o le saunoaga a le sui usufono, ia e aumai lava le tuualalo e logomalie i le faafofoga a le Malo. Malo le saunoa, ua malo foi le saili i le tofa ma le faautautaga aua se sao o le itumalo. Ia talu ai ona o le sui usufono mulimuli lea sa tuuina atu le avanoa e saunoa, ia ua tatou see mai loa i le tulaga o le tatou fesili.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Auaunaga Faa-Soifua Maloloina a le Atunuu 2018 i lona faitauga faalua.*

**TULAFONO TAU FAAOFI O TEUTEUGA O LE TULAFONO O  
AUAUNAGA FAA-SOIFUA MALOLOINA A LE ATUNUU 2018  
– Iloiloga Auiliili**

**FOFOGA FETALAI:** Talu ai ua taulimaina le Tusi Faamaonia o le Tulaga Faanatinati, o lea o le a sagai atu ai loa le Fono Aoao mo le iloiloga auiliili.

**FUAIUPU 2: Ua teuteuina le fuaiupu 6.**

*Faamaonia.*

29 IANUARI 2018

**Tulafono Tau Faaofi o Teuteuga o le Tulafono o Auaunaga Faa-Soifua  
Maloloina a le Atunuu 2018 – faitauga faatolu**

**FUAIUPU 3: Ua teuteuina le fuaiupu 8.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Auaunaga Faa-Soifua  
Maloloina a le Atunuu 2018.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Auaunaga  
Faa-Soifua Maloloina a le Atunuu 2018 e aunoa ma se Teuteuga.*

**TULAFONO TAU FAAOFI O TEUTEUGA O LE TULAFONO O  
AUAUNAGA FAA-SOIFUA MALOLOINA A LE ATUNUU 2018  
– faitauga faatolu**

**Afioga Hon TUITAMA TALALELEI TUITAMA (Minisita mo le  
Soifua Maloloina):** Lau Afioga i le Fofoga Fetalai ou te faatu le lafo, *Ina  
ia faitauina nei le Tulafono Tau Faaofi o Teuteuga o le Tulafono o Auaunaga  
Faa-Soifua Maloloina a le Atunuu 2018 i lona faitauga faatolu.*

*Faalua e le Minisita mo Pisinisi, Alamanuia ma Leipa ma le Minisita mo  
Tagata Tafafao Maimoa Mai Fafu.*

*Na faamaonia le lafo ma faitauina le Tulafono Tau Faaofi i lona faitauga  
faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE FAAVAE 2018  
– faitauga faalua**

**Susuga Hon TUILAEP AUELUA FATIALOFA LUPESOLIAI  
LOLOFIETELE NEIOTI AIONO GALUMALEMANA Dr. SAILELE  
MALIELEGAOI (Palemia)** Lau Afioga i le Fofoga Fetalai ou te faatu le  
lafo, *Ina ia faitauina nei le Tulafono Tau Faaofi o Teuteuga o le Faavae  
2018 i lona faitauga faalua, ma ou te fia tautala faamalamalama i ai.*

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

*Faalua e le Minisita mo Pisinisi, Alamanuia ma Leipa, Minisita mo le Soifua Maloloina ma le Minisita mo Tagata Tafafao Maimoa Mai Fajo.*

**FOFOGA FETALAI:** Ou te tapa ma le faaaloalo lau Afioga i le Palemia mo lau saunoaga faamalamalama.

**Susuga Hon TUILAEP AUELUA FATIALOFA LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, o le Tulafono leni Tau Faaofi o Teuteuga o le Faavae 2018, o se Tulafono ua manatu le Kapeneta ma le Faigamalo leni ua tatau ona faia se galuega o le tulaga au i luma o le tatou Faiga Palota Lautele.

Talu mai ona tatou Tutoatasi, e le i toe lotea lava le tulaga o le toe faatulaga o tuaoi faaitumalo o faiga palota. Ma e ua silia i le 50 tausaga talu ona tatou Tutoatasi. Ma e ou te manatua le taimi na faatoa ou ulufale mai ai i le Palemene, le laga pea mai laga pea mai e sui a usufono o le Maota leni ua moomia ni o latou sui usufono faaopoopo, ia ona sau sau ma talia e le Palemene faaopoopo sia lua. Ae o le faaopoopoga lena, e le i lotea lava le fatu o le Faavae e tatau ona faataoto ai se faiga mautu mo le agai i le lumanai. O lona uiga, e na ona faatapepe lava o fuafuaga a le Palemene ma Paeaiga i aso ua tuanai, ae le i lotea lava le fatu o le Faavae na faapogai ai ona faatulaga tuaoi o faafaiga palota.

O le ala lena na ala ai ona oo foi ina fai a tatou Komisi Suesue ma sau ai lava ia fautuaga i totonu o Komisi Suesue ona e le natia, o lo o tupu pea le faitau aofai o Samoa, ma e le mafai, le mafai, le mafai ona tumau ai pea Samoa i le Faavae na faatulaga mai o tuaoi palota mai le 1962. Ua tupu le faitauaofai ma ua toe mafai ona toe taofiofia.

O le ala foi lena na ala ai ona agiga i le Paeaiga talu ai, i le faaiuga o le Paeaiga talu ai, o lo o fuafua le Malo e matua sua le aulapauta, sua le aulapatai, ae tilotilo i le Faavae na faavae mai ai ia sui usufono o itumalo. O mea ia e faataua e Malo uma o le lalolagi, e tatau ona i ai se paleni, e tatau ona i ai se amiotonu, i le faatulagaina o tofi o itumalo e omai i totonu e faia tonu o le atunuu. E le na o Samoa la e tutupu ai lagona ia, e tutupu lava i atunuu uma. Ina ua faatalanoa foi i le Temokarasi pito tetele o le lalolagi o le Malo lea o Amerika, o mea ia na agai i ai ia le liliuga o le tofa. E tatau ona i ai se amiotonu i le faataotoina o tonufai o le Malo o Amerika. E tatau ona i ai se tutusa, o sao o tagata i le fatufatuina o le Malo i ona tonufai. O le ala lena na ala ai ona faataoto le latou faiga faavae i le filifilia o mea nei o sui faatutu, e tatau ona i ai se paleni. O le ala lena na ala ai ona faatutu e latou lua Maota, o le Maota o sui e faavae i luga o le faitauaofai o tagata i se tulaga foi lele mo se faataitaiga ia tai 100,000 ia tagata o le itumalo ia tasi ia le latou sui i totonu o le congress po o totonu o le fonu a sui. A 200,000 ia le aofai o lea itumalo, ua lua a latou sui, a 300,000 lea itumalo ua tolu a latou sui.



29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

Ia ona tali loa lea o le fesili, ia tau i ai se paleni o le faitau toatele o isi itumalo ma le toalaiteiti o isi itumalo. Ae tupu ai loa ma le manatu, ae faapefea la pe a soonafai e le toatele le toalaiteiti? Ia ona manatu loa lea o i latou na faatuina le Faavae, e tatau la ona fai se isi Maota, ona faapea lea, e tasi lava le setete ona lua lea o latou sui e tutusa uma lava. O le mea lena i le 50 Setete o Amerika i le Senate le fale, o le isi fale lea e fau Tulafono, e tailua sui e tutusa uma le laiti ma le aulapopoa. Ia ae saili la le amiotonu i le paleni i le Maota o sui faavae i luga o le faitauaofai.

A oo la ina pasi la le Tulafono, ae faaoga le faitau toatele o isi itumalo e pasi ai le Tulafono, ae aumai fasioti i i e le Senate. E tutusa uma ai lava ia itumalo tai lua sui.

I le tausaga e 1991, na i ai se manatu faapena foi i totonu o le Malo. Ae tau ia ona tilotilo i le mea lea, se i tau i ai se paleni, se i tau i ai se amiotonu, tau faatutusa ai ia mea nei o sui ia tutusa itumalo tetele ma itumalo laiti, ae faalua ia Maota. Ia ona fai lea o le Pelepesite, e lua fesili. Pe tatau ona palota ia latou ua 21 tausaga? O lona uiga o le a talatala i tua i taulelea, ia ma faifeau, ia ma fafine. E muamua atu sa na o matai, o lea ou te tau manatua pe na o le 30 ea le aofai o matai palota iinei i Faleata i Sasae. O lona uiga a 20 loa au palota ua e faipule.

O i la i le tausaga lea, na fai ai le Referendum po o le Pelepesite ae fesili le atunuu ave i ai ia vaega ia e lua. Pe tatau ona fai Maota ia e lua, Maota Maualuga ma le Maota Maualalo? Ia ma le lua, pe mafai ona tatala loa le palota? Sau loa ua talia le tatala o le palota ae fasioti le lua o Maota. O lea la ua tasi lava le tatou Maota, ae e le o aveesea ai le le paleni ma le 1 fetau lea e faaauu pea.

E ui sa faaopoopo le lua, ia ona agai ai lea i luga le aofai o Nofoa o le Maota lena mai le 47 sa i ai i le 49, ia ona fai loa lea o le tatou Tulafono e ave ai le.....ona o le tulaga foi ia i ai se paleni i le va o alii ma tamaitai. O lea la na faatulaga ai lea, ia i ai lava se 5 tau mai le 5 ina ia maua pea le 10%, o lea la na ala ai ona faatulaga teuteu le Faavae e le mafai ai ona i lalo ifo o le 5 sui o tina i totonu o le Maota lena, ia ona faatulaga loa lea e mafai ona 50 aua e 49 lea sa i ai, ae afai e 5, e tatau ona oo i le 54.

O lona uiga la, i le taimi lena e tatau foi ona faatulaga i le Faavae ia le 49 e tau i le 54, ina ia mafai ai ona maua ni sui tamaitai. Ae afai lava e sau lava i le palota o la ua i ai lava ia sui tamaitai i totonu o le toalima lea, ona tumau lava lea o le 49 e le suia. Na ala ona toe teuteu ina ia mafai ona tali atu i le mea lea ua agai i ai le lalolagi, ina ia i ai ia se fuainumera o tina e le i lalo ifo o le 5. Ae o le fuainumera autu lava ia o le 49 o lo o tumau pea, ae mafai ona feosoosofai ina ia faatino ai le agaga lea o le tatou Malo ina ia faalaolao pea ia le 5 faaleoleo ina ia tali ai le manao lea o tatou, ia i ai ni sui o tina ia le i lalo ifo o le 5 tamaitai faipule.

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

Ae le i aveesea lava le mea lea e le i lotea lava le fatu o le tatou Faavae i le tulaga o le tatau ona toe tilotilo lelei i le Faavae ma faataoto ai se faiga tumau, ma e leai se isi taimi e toloa ai. O le taimi lenei e tatau ona tagofia ai loa ina ia fai so tatou sao, ina ia faataoto ai loa le fuainumera e mafai ona filifili ai loa sui mo le agai atu i le lumanai ina ia tau i ai se paleni.

O faiga la e masani ai ia Malo Temokarasi o le lalolagi, o le uma o sia vaitaimi po o le 15 po o le 10 po o le 15. O Niu Sila e tai suisui lava ia latou tuaoi palota i faiga palota uma, ona o le tele o le mea lea o le feoai o tagata, o le feoai o tagata mai lea mea i le mea lea i luga o galuega. O lona uiga, e le mafai, le mafai, le mafai ona tatou ignore ina ma le agai o mafaufauga i le tulaga e tatau ai ona faataoto se Faavae mautu. O lona uiga e tatau lava ona faataua ia le aofai o tagata mai lea itumalo i lea itumalo. A oo loa i le tulaga ua tau le fetau ai, ia ona toe tasui foi lea o tuaoi palota.

O le auau atoa lava lena o le Tulafono lenei, tatou teuteu ia se Faavae mautu mo le agai atu o Samoa i le lumanai, ma o lea ua tatou i ai i nei ona aso ua sui atoa le lalolagi, ma e le mafai ona alofia le faataua o lea lava ua aumai lava i lauga i lea tausaga ma lea tausaga, ua toatele lo matou itumalo, e le fetau sui ia e i ai ua tatau ona toe faaopoopo, ua le mafai lava ona alofia ma e le mafai foi ona tatou alo i le ata o le niu. O tatou lea na tofia mai e le Atua tatou te omai e saofafai i totonu o le Palemene lenei aua tatou te alo, aua le palaaai e faatino suiga. O upu a le Tusi, *' o le na te iloa le mea e tatau ona fai ae le faia, o le agasala aiai i luma o le Atua Silisili Ese.* O le tulaga lena lea e i ai le Teuteuga lenei. O lalo o le Faavae e le mafai lava ona tatou agai atu e fai ni teuteuga se i vagana ua Teuteu le Faavae, lea o lo o i ai le faamoemoe e faataoto mai i i le masina o Mati le Tulafono fou atoa, o le a le toe taua o se Tulafono o Faiga Palota o le 1963, ma nai mea foi taiepi o le teuteuga o le auala, e faatutumu ane nai pu palapala i lea mea, faatututumu ae nai pu i ia mea, ae le o mafai ona laulelei ai le auala, seiloga e suati atoa i luga pu, ae toe faata lelei le auala. A lea e sau ia outou lauga, ga o mea ia tatou te faia nei na o mea fonofono, fono atu le auala i i fono ane, na ona sau lava o timuga toe leaga atoa le auala.

O le mea lea o lea ua tatou faia, o le sao lena o le Paeaiga lenei, toe teuteu atoa le Tulafono o Faiga Palota, ona taua loa lea o le Tulafono o Faiga Palota, o le Tulafono o Faiga Palota 2018, o le a le toe taua o le 1963 ona o le tele o mea fonofono, na o mea fonofono ma mea fonofono sa fai mai lena taimi. O lea la ua tatou agai i le mea mautu ma o upu a i latou, e suia e tusia ia Tulafono, e moomia ona amanaia faaletulafono suiga nei i le taimi e pasia ai le Tulafono Tau Faaofi, ona o galuega e fia faia a le Komesina o Faiga Palota. Mo le teuteuina o Lola Palota, ma o le ala lena o lo o aofia ai le Tulafono Tau Faaofi le aiaiga tau soloaiga, transitional e faatino ai lea tulaga i le Fuaiupu 4 o le Tulafono. O le tulaga o le faatulafonoina o nei itumalo faapalota fou, e 51 i totonu o le Palemene, faatoa mafai ona faamalosi lea tulaga i le aso faatoa tuua ma faataape ai e Le Ao o Le Malo le Fono Faitulafono, i lalo o le Fuaiupu 63 o le Faavae.

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

O leni Tulafono Tau Faaofi, e moomia ona pasia muamua faatoa mafai ai, ona pasia Tulafono Tau Faaofi mo le Faiga Palota 2018, faapea le Tulafono Tau Faaofi o Itumalo o Faiga Palota 2018 o lo o tuuina mai e le Ofisa o Komesina o Faiga Palota i luma o le Kapeneta mo le auala mai ai, o lea o lo o i ai le faamoemoe, o le masina o Mati e taunuu mai ai le Tulafono fou atoa, o le a faatoa mafai ona tagofia, pe a tatou faia le pasia o le faitauga lona lua o le Tulafono leni Tau Faaofi.

Lau Afioga i le Fofoga Fetalai, o lea ua i ai la le faamoemoe e toe faaopoopo a tatou itumalo faapalota i le 51. E faatoa mafai le mea lena ma isi teuteuga pe a mafai ona pasia le faitauga lona lua o le Teuteuga o le tatou Faavae. Lau Afioga i le Fofoga Fetalai, e i ai le sootaga vavalalata o le mea leni o le aofai o sui usufono po o nofoa o le Palemene ma le faitauaofai o se atunuu. O lea faatoa uma atu nei le faiga palota a Niu Sila, pe a ma le selau ia le aofai o sui usufono o le Maota o Niu Sila, le Palemene. Ae faitau miliona ma miliona ma miliona ia le aofai o le population, le aofai o tagata i Niu Sila, ae na o le 101 ea pe 102 a latou sui usufono. A tuu mai la ia tatou, o lea ua 50 ia sui usufono, ae na o le 190,000 le aofai o tagata. O lona uiga, a faaluaina ina ia tutusa ma Niu Sila i le 100, o lona uiga na o le 380,000 la le aofai o o tatou tagata.

O le mea ua i ai, ua matua ova mamao ia sui usufono o le Palemene pe a fua i le faitauaofai o tagata o Samoa. A fua i le ratio lea a Niu Sila, pe tau ai foi ma Ausetalia, sa tatau na o se va o le 20 i le 30 le aofia o sui usufono e tatau ona i ai i totonu o le Maota leni, o le isi la vaega ua soona tele ai tupe alu maumau a le atunuu. O le ala la lena e ala ai ona faaeteete tele mea nei o Malo, i le soona faatoatele. E tatau lava ona i ai se sootaga i le faitauaofai o tagata.

A o le faitauaofai foi o tagata, lau Afioga i le Fofoga Fetalai, e i ai le tulaga faigata. O le tulaga faigata lea e i ai, e le mafai ona tatou aveesea le mea leni. E soloai mai pea tagata mai tua i le taulaga, a o agai i luma le soifuaga, o le mea lena e tupu, o le soloai mai pea o tagata mai tua i le taulaga ona o galuega ma aoga. E le o se mea na o Samoa lea e i ai le faafitauli lea, e aofia uma ai lava atunuu o le lalolagi. E fiu lava e vina atu, -ia o le a outou o mai la i le taulaga e tou te nonofo fia aai ai o la e tele fanua i tua,ø ae e le mafai, leaga o le natura lena o le soifua e tupu i Niu Sila, tupu i Ausetalia, tupu i Rusia, tupu i Amerika. A tatou o nei i Amerika, o le atunuu e tafe ai mafiafia le suasusu ma le meli, ae momoe tagata i lalo o le aualalaupapa e leai ni fale. Na ou vaai tino i isi tagata e feoai ma a latou taga, o taga e amo solo, na e i ai i totonu i ina atigitaga, o palanikeke. E oo loa i le aso malulu sue loa le paka i lalo o se laau e moe ai, o lona aiga lena e nofo ai i Amerika, o le atunuu o lo o tafe ai le suasusu ma le meli mafiafia. E le o maua se mea faapena i Samoa nei.

Lau Afioga i le Fofoga Fetalai, e leai nisi o toe oi sili, o tatou e faia iuga e faalagolago mai lo tatou atunuu ia i tatou. E tasi lea mea e fefefe tele Malo e fai, e fefefe e sui Faavae, fefefe, fai mai, -ø le tagata e sui Faavae o le tagata lena e malaia.ø

29 IANUARI 2018

**Tulafono Tau Faaofi o Teuteuga o le Faavae 2018**  
– faitauga faalua

Ua faafia ona o tatou suia o tatou Faavae mo le lelei o le atunuu lenei agai i le lumanai? Ua fia sefulu tausaga tatou te feoti ai, ae manatua e tupulaga fai mai le aso lenei. O le aso lenei ua faataoto ai se faiga fou, e matua tatou agai ai i le fatu o le tulaga o le faaamiotonuina o faiga filifiliga o sui o itumalo, ina ia tau i ai se faalaugatasia o tagata ma le filifiliga o latou sui e omai i totonu o le Maota lenei, e latou te faia tonu o le atunuu.

Lau Afioga i le Fofoga Fetalai, o le isi suiga ogaoga lea e i ai i i, o le faaupuga o le upu, o le a le toe taua itumalo o itumalo faaalalafaga, ae o le a tau sao lava le itumalo, itumalo faiga palota, o le simple faigofie tuusao, malamalamagofie, o le itumalo faapalota. Aisea? Aua o suiga nei, e agai tonu lava i le palota e le aafia ai ni faatulagana o tuaoi faaleaganuu. Afai o lea sa tatou faafogafoga i le saunoaga matagofie a le Afioga ia Tupua Laauli, lea ua faalupe nei o le Tupua na ee ona papa i le Aso Toonai talu ai. E le faapea o le a suia ai, e le faapea o le a suia ai tu ma agaifanua, lea na o atu uma lava itumalo e oo lava i faleupolu i Saleaumua na o atu uma lava, Lotofaga ma isi ma le lalolagi atoa, sa i ai uma lava, aua e le mafai ona taofia a tatou tu ma agaifanua. Sa luga lalo foi ia Safata, ina o le a fai suiga, ua a nei? E le o aafia ia tulaga o agaifanua. Na o le pau lava le mea lea e talanoa i ai le Tulafono, o itumalo faapalota, a uma lava le palota ua uma. Ma talatalanoa le tagata ia, aua tasi lena mea e matautia lea e i ai nei.

O isi itumalo ia ua sau i luga le faitauaofai e fia sefulu afe tagata o le latou itumalo i le population bases i tusiga igoa, le aofai o i latou lea e tusi ai i i igoa, ae faitau ane tagata o la e lesitala i lola palota, e le atoa le afe. O fea o i ai? O lea e omai lesitala solo. Ae o ai ia e faapogai ai? Lau Afioga i le Fofoga Fetalai, e faapogai ia i tatou o sui usufono. O tatou tatou te lauga i inei, ia tatou faia le amiotonu, ae o tatou lava lenei e toe o foi talepe Tulafono, aemaise le agaga foi lele o le fia malo, ona alu loa lea talau mai tagata o isi itumalo. O le mea lena o lea e taumafai lo tatou Malo ia foia i i, ia foia i i Teuteuga nei. E le faapea foi o le i ai o faafitauli, ona tatou toilalo ai lea, o luitau lena na ala ai ona tofia i tatou e lo tatou Matai Sili, tatou te omai e fai mea lelei mo lo tatou atunuu o lo o tapuai maia o tatou faiva.

Lau Afioga i le Fofoga Fetalai, o le faamatalaga lena o le Tulafono faigofie ina ia saili ai le amiotonu i sui faatutu ma le sao o itumalo faapalota e fai ai tonu o Samoa. Lau Afioga, ia o le faamalamalamaga lena.

**FOFOGA FETALAI:** Malo faafetai, atonu o lea ua manino auofala, ua faapena foi ona logoi logoa ma ua leai se vailiu e le i oo i ai le faamalamalamaga a le Palemia, e tusa ai o le Teuteuga o le Faavae ma le mataupu e pei ona tuuina mai i luma o le Palemene. Atonu foi e leai se isi e toe fia saunoa ua manino auofala i le tulaga o lo o i ai. Ae o le a taumafai e tuuina atu loa le fesili.

Le sui usufono mo Falealupo e te fia saunoa i le mataupu?

**Afioga Hon Aeau Peniamina Leavaiseeta (Falealupo):** Ioe lau Afioga.

29 IANUARI 2018

**Tulafono Tau Faaofi o Teuteuga o le Faavae 2018**  
**– faitauga faalua**

**FOFOGA FETALAI:** Ia ua lelei. E talu ai o lea ua tulai mai o le alii matua o lea itu o le Maota, o le a tuu atu le avanoa i se taimi pe a tatou taliu mai i le tatou malologa masani.

O le a faataatiaese Galuega a le Fono Aoa mo lana malologa masani.

*Na faataatiaese Taulumaga a le Fono Aoa Faitulafono mo lana malologa masani i le itula e 10:55 i le taeao ma toe faaauau i le itula e 11:33 i le taeao.*

*Na toe faaauau felafolafoaiga i luga o le faitauga faalua o le Tulafono Tau Faaofi o Teuteuga o le Faavae 2018.*

**FOFOGA FETALAI:** Ou te faasilasila atu ua toe amatalia nei Taulumaga ma Galuega a le Fono Aoa Faitulafono.

E talitonu le Nofoa ua maua le malosi faaopoopo i le paia o le Palemene e faaauau ai le tatou galuega. Pei foi ona faafofoga i le faamalamalamaga a le Taitai o le Malo i lenei Tulafono Tau Faaofi, ua faapena e i ai le talitonuga ua faapena ona manino i la outou faafofoga. Talu ai ona o sui usufono matutua o lea itu e agaia le Malo, e i ai le manatu o le Nofoa o le a tuu atu ia i sui usufono mamalu e pei ona tulai mai, sui usufono ia e toalua ua fai ma sui usufono o lena itu, ona faagasolo ai lea o le tatou galuega.

Tulai mai le sui usufono mo Falealupo.

**Afioga Hon AEAU PENIAMINA LEAVAISEETA:** Lau Afioga i le Fofoga Fetalai, i le ava e tatau ai ma le faaaloalo tele ou te tulai ai i le pau o le Maota o le Palemene mamalu o Samoa i lenei taeao. E talitonu foi ua maea ona toto le niu i le tuaoi i le tatou viiga ma le faasagi i le Atua i Lona alofa ma Lona agalelei ua opea ai ona taitaiina mai lo tatou atunuu i le toafimalie, ua tatou faalogologo atu i tala o le lalolagi i nisi o vaega a atumotu, faafetai i le toafimalie o le atunuu.

O lenei taeao lau Afioga i le Fofoga Fetalai, e lagona lava le faagaetia ona o le faalogologo atu i le tulaga ua oo i ai le tatou Faigamalo, lau Afioga i le Palemia ma le Kapeneta, ua malie malo malieo. O a outou galuega faapitoa e taula uma i ai le silasila le faamoemoe o si o tatou atunuu i taulumaga masani, e le faigofie, e faigofie tele ona lafo le pua i tulaga faapea ae tainane lea o le faafetai e toafilemu le atunuu. O le talitonuga foi lea, e ala i se a? O lo o sologa lelei pulega sa faataatia mai e outou tuua ma o tatou matua i upufai o Malo, Vaega Faaupufai i tulaga so o se mea, o lea lava tatou te tauaveina e oo mai i lenei vaitau. O le agaga faafetai lava lea, aisea? E sologa lelei lava Samoa, o le agaga faafetai lava lea e le laumaua foi e nisi o atunuu.

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

Ae tatou vaavaai i lalo, tatou ave le faafetai ma le faamua pea i lo tatou Matai i le lagi, i Lona alofa ma le mana o le agaga e musuia Taitai o le Malo lau Afioga i le Palemia ma lau Kapeneta filifilia ma sui usufono mamalu o le Palemene ma le tatou galuega ina ia taulau o le faamoemoe ma le tapuaiga a le tatou atunuu, o le faafetai lea a Falealupo.

Lua, faafetai i lau Afioga i le Palemia ma le Malo i fuafuaga ma manaoga o lo o sulufai mai ai itumalo uma e aofia ai ma lenei itumalo ma tulaga faaaoga, o le mea moni o lo o faafofoga mai le itumalo, i le sologa lelei ma le faafaigofie, aemaise auaunaga mo itumalo ma le mamalu o le atunuu i fafo, ua tapenaina ma faatulagaina e le Malo le soifua maloloina, aoaoga, faamalo faafetai. O le agaga, o outou mama na lau Afioga, ua malie, malie pule, malie malo, malie faasoa, o le agaga faafetai lea.

Lau Afioga i le Fofoga Fetalai, o le tatou Tala o le Tupe e pei ona fuafuaina ma tatou fuafuaina e tatou te soalaupuleina, o fuafuaga mamao tuutumamao a le Malo, e vaavaai lava ma le totoa, i se a? E i ai le agaga faafetai lelea i le faatulagaina, e le faapolokalame uma, aemaise lava tatou fesoasoani mai fafo ae tuufaatasia. O lo o maitauina lava o matou nei mai tua, o lea e talituaa mai i le faasoa, faasoa a le Malo. Tulou lava o le upu e to ia te au o lenei itumalo, e le faapea o le a faalele falelei atu, lau Afioga i le Palemia ma le Kapeneta ma le tatou Malo, i lenei taimi, e faasilasila atu ma le faafetai, e leai se mea, na o le agaga faafetai, aisea? Leaga e matou te o faatasi ma isi o matou uso a tuaoi e laugatasia uma. E le o sasi pe faatauvaa le silasila a le Malo i itumalo, tulou lava le gagana ia te au, that's the one good point about the administration. O lo o maitauina e silasila itu uma o le atunuu e le faapitoa i se vaega e, geographically e na o iinei i Apia. Matou te faafetaia lea fuafuaga ma matou tatalo foi ina ia tumau pea, aua pei e le o se mea foi faatoa fai nei talu ona tulai mai lena itu i lau puleaga lau Afioga i le Palemia, manaia ia, a tutusa uma e leai se isi e tomumu. O le matou mau lea lau Afioga, ua i lumamea le tatou tapenaga mo le atinae o si o tatou atunuu ma fuafuaga a le Malo e mulimulitui lava, e faigofie ona le lagalaga se manatu na o le agaga faafetai, o lo o sologa lelei ma le tatalo, ia tumau ai pea.

Lau Afioga i le Fofoga Fetalai, o se mau lea a lenei itumalo mo le tatou o lo o feagai ai, o le tatalo, ia toaia pea i le Maota nei Lona filemu ma fuafuaga e manuia ai lo tatou atunuu, faafetai.

**FOFOGA FETALAI:** Faafetai, faamalo le saunoa faatoeaina. Se i tulai mai le toe sui usufono o lo o fia saunoa le sui usufono mamalu mo Palauli le Falefa.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai, faafetai o lea ua maea ona talisua le Palemene i lau faaalologa, faafetai foi ua toe vaavaai atu sulu o le tino i lou soifua laulelei.

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

Faafetai mo le avanoa e fai ai foi se fesoasoani po o se tuualalo i le tatou Faigamalo aemaise foi o le Afioga i le Palemia o lo o faafoea lenei Tulafono. Lau Afioga i le Fofoga Fetalai o le taua ia o le faamalamalamaina e le Afioga i le Palemia o le suiga o le Faavae, e tele suiga o le Faavae sa faia foi i tausaga ma Paeaiga ua mavae atu, e oo foi lava i le Paeaiga lenei o le faatolu ai lea ona aumai ia suiga o le tatou Faavae. A o le manulauti sa fuafua i ai le suiga lea, na saunoa le Afioga i le Palemia, ia atagia ai le amiotonu, ia paleni, ma fai faiga tumau mo le agai atu i le lumanai. O le taua ia o le saunoaga lea a le tatou Taitai, ma o le fuaiupu lava lea e ese lou fiafia ou te faalogo ai pe a saunoa ai ia le tatou Palemia, aua le palaai e faatino suiga lelei ia si o tatou atunuu. O le paleni, o lea ua ou faalogologo atu i le saunoaga, o le a fua i le mea e mafuli i ai le faitauaofai. E taua tele lea, ae le tatau ona itutasi le silasila a le Malo i le mea e mafuli i ai le faitauaofai. E tatau foi ona silasila le Malo i le sao ole Motu tele i Salafai i le tamaoiga o atunuu, e pei o faatoaga ma isi oloa. O le faitauaofai, e 40 i le 50% o tagata Savaii, o lea ua i Upolu nei, ae mafua ona omai, e le o maua mea ia e omai e saili i Savaii. O le mea foi lena o lea e taulaga atu ai lava i lenei foi Paeaiga, se i fai le uafu i Salelologa e sue ai ni tupe ma o ai vaa e lau mai matou talo ma mea uma faapena e ave i Niu Sila ma Ausetalia. Aua a fai le faiga lea, o le a le toatele nisi e toe omai ma nonofo ai i inei ma fai ai solitulafono ona ua toatele naunau le faitauaofai o tatou tagata i totonu o le taulaga.

**FOFOGA FETALAI:** Malie le sui usufono se i tulai atu le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ua ou toe tulai atu lava e fai sina au upu i le uafu lea i Salelologa ona o le uafu lea sa ma faia ma le Minisita o saunoa nei. Ia, ma o lea foi sa faalauaitele o le uafu faava o Malo. O lona uiga, e mafai ona afea ma taula ai vaa, aua o lea sa afea ma taula ai vaa mai fafo. O le tulaga e i ai, a faapea e papau, o lona uiga e toe faaloloto, o lea foi ou te iloa o lea e agai le Matagaluega e toe aumai isi palolo sili atu ona malolosi ina ia mafai ona faaloloto.

Ae ina ua fesiligia au i le tulaga lea pe i ai nisi vaa e toe o atu i Savaii, e tasi lava le auala e o atu ai vaa i Savaii, e toatele latou faipisinisi e oka sao latou oloa ma avatu ai ma alu atu ai ma le vaa i Savaii. Ma o le agaga foi lena o lea sa gaoioi ai ina ia faatelevave le faalauteleina o le tatou taulaga i Salelologa. O lea ou te talanoa atu i taulaga eleele ina ia vave faasalalau e faatoatele ai pisinisi aua a toatele loa pisinisi, e mafai ona justify le afe atu o le vaa ma containers e afea le uafu i Savaii. O le tulaga lena e le faapea o aveesea le tulaga lena o le uafu faava o Malo i Savaii, a o le mea e moomia, o le faatoatele o le aufaipisinisi i Savaii e lapopoa loto ina ia vave ona faatoatele ai pisinisi ma oka sao ai oloa ma afea ai loa Savaii.

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

O isi la vaa e mafai ona afea Savaii, o vaa foi nei o meli, a o lea foi la e taoto polokalame, ua uma foi ona faatalanoa ma isi foi Malo i fafo, e fai uma ai lava uafu ia i Savaii, aemaise o le uafu lea i Asau. O le faaletonu o Asau, ona o le uafu i Asau e le o se natural harbour, e masani ona ava le mea lea o le auu pe afai e tafe ai se vaitafe. O le faaletonu la o Asau, o le papa sosolo lea na sau le inisinia mai fafo i le 1970 tuumaulu ai ma fai lana upu, fai mai e fiu e aumai pomu e tapomu ai e le ila papa sosolo ia. O le ala lena o lea na faapeaola ai lava le uafu lena, a o lo o talanoa sao lava isi inisinia ia na omai i le tausaga talu ai ma faaalua ai, ua ese la aso na ua le toe faamoemoe i ni pomu po o ni fana ia. O aso nei ua i ai masini na ona alu atu lava o le masini aati uma papa ia, talepe atoa ona toe loloto ai lea. O lona uiga, e tele lava le avanoa, ma o lea foi na ave le tatou talosaga i le Malo o Saina pe mafai ona latou fesoasoani i tulaga ia o le faalauteleina o ava, e aofia ai la Asau, o Salelologa faapea foi ma Aleipata. O lona uiga, o mea ia ua uma ona fai, ae le i aveesea, ua uma ona faatalanoa ae le i aveesea le tulaga o le international port o Savaii, aemaise o lea e malamalama i ai le Afioga i le Minisita sa aafia tele ai i le tulaga o le fausia o le uafu lena faava o Malo ma sa ou lauga ai foi i le aso sa tatala ai.

Lau Afioga o lau fesoasoani atu lena i le mataupu lena, o lo o i ai taumafaiga a le tatou Malo, o le ala foi lena na ou tofia ai le isi Savaii lea o Lautafi e fai ma ana faataua le matua faatino atoa o le atinae lea i le mea lea e tu ai le maketi, ia matua tele ni pisinisi e faatu ai i ina mai fafo ma iinei ia vave ai ona faatino le mea lena, aua e fiu lava e alaga e fau se uafu tele, ae a le lava le aufaipisinisi e okaina oloa ma faaape ai vaa i Savaii, ia, e le mafai ona ausia le faamoemoe lena.

Lau Afioga i le Fofoga Fetalai, o le toe faaopoopo atu lena i le mataupu.

**FOFOGA FETALAI:** Malo faafetai. Ua ou vaai atu pei o lena e fiafia lava le sui usufono ina ua aumai le saunoaga a le Afioga i le Palemia ua faamalieina ai le saunoaga a le sui usufono o lo o tulai mai.

**Afioga Hon FAUMUINA TIATIA FAAOLATANE LIUGA:** Faafetai i le Afioga i le Palemia mo le faamalamalamaina ma ou te iloa o la e silafia foi e nai ou uso a Minisita, le Afioga i le Minisita o Tupe faapea foi le Afioga i le Minisita mo Pisinisi ma Alamanuia. O le tagata tonu lava e te lua fesili i ai e fesoasoani atu ia oulua i le vaega lea, o le Afioga ia Peseta le sui usufono mo Faasaleleaga Nu.4. O ia na fauina auala o le 100eka muamua, ae tai 200mita na alu ai le paipa i lalo ia aua ne i toe tosoina i luga le eletise ma le telefoni, a ia alu uma i lalo o le auala. O lona uiga, o le faufautua faapitoa lea ou te tatalo atu i a oulua Afioga ia i ai i la oulua Komiti.

Lau Afioga i le Palemia, o le tulaga paleni. Ou te lagolagoina le Tulafono Tau Faaofi i le suiga o le Faavae. Na pau lava le mea Tuilaepa, o lea e le i lauina mai po o fea tonu itumalo e alu i ai le tolu nofoaga ia, ae aua ne i aveesea se itumalo faaitumalo mai Savaii. Taatia pea le 21 i Savaii, ae pule le Kapeneta po o fea e tuu i ai le 3 lea, ona 52 lea o itumalo faapalota.



29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

A le o lena, ia faaauau uma le tai lua o isi itumalo tetele pe afai o le population lea e define agai i le toatele o tagata po o eleele. Ma lou faaaloalo lau Afioga i le Fofoga Fetalai.

**FOFOGA FETALAI:** Malo. Ia se i tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o mataupu uma lava na o lea e aumai i le Palemene. Na o le pau o le mea, e le toe tailuaina ni sui usufono i ni itumalo, o le a tasi lava le itumalo tasi le sui usufono. Ae pei ona ou taua, o le fetuunaiga e faatino i mea o tuaoi. O le tulaga aupito sili lena ona amiotonu mo le agai atu i le lumanai, ae le toe faaluaaina ni sui usufono. O le mea lena e tupu ia le mea o le nunu o le toau, ona o ituaiga fonofono na o lea sa ou talanoa atu ai o le tupu mai lava o lea mea fono, fono, fono, ae tatou agai i le fatu o le faatulagaga o mea nei i le mea e tatau ona i ai. E tasi lava le itumalo tasi le palota, ona taoto ai lea i le fetuunaiga faaitumalo faapalota ae le o le itumalo e tumau lava le itumalo faaleaganuu ia.

**FOFOGA FETALAI:** Malo. Ia tulai maia le sui usufono mo Palauli le Falefa e faai mai le saunoaga.

**Afioga Hon FAUMUINA TIATIA FAAOLATANE LIUGA:** Faafetai i lau Afioga i le Fofoga Fetalai, faafetai foi mo le faamalamalamaina. E pei o le mea lea ou te tau tulituliloaina atu lau Afioga i le Palemia, taatia pea le 21 o nofoa mo Savaii, e pule la po o fea tuaoi e tuu i ai, e le afaina lea, ae aua ne i aveesea le nofoa lea ua ou maua, ou te le i mautinoa lea na lauga se tasi o sui usufono e toe fia tauva ae ua leai se mea e sau ai. Ia ma lou faaaloalo lava lau Afioga, o le tatalo lava a si o matou motu, tusa o lea ua aveese mai aua sa i ai foi nofoa foi nei o palota taitoatasi, ua mou mai lava lena mea ma ua faapena foi. A o le nofoa lea, e tatau ona taofi pea le nofoa lea faa-21 pea Savaii pule oe po o le a le faaopoopoga o Upolu nei.

**FOFOGA FETALAI:** Tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, o le mea lena lea sa ou taua ai, e le i aumaia le Tulafono e talanoa ai le mataupu lena, na o mea lautetele lea ua aumai ia ona tatou talanoa ai lea i le fetuunaiga. O le mea la lena e faatoa talanoa i le Tulafono lea e fofou mai. Ae le mafai ona tagofia le Tulafono lena, pe a le tagofia muamua le vaega lea. O le ala lena, taatia pea le vaega lena se i aumai le Tulafono, aua o mea nei o Tulafono, o le Maota lava lena e teuteu atu ai mea uma.

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

Lau Afioga i le Fofoga Fetalai, o le toe faaopoopo atu lena, ae leai lava ma se mataupu o faatatau po o ai e ave i ai a o ai e tumau, na o le pau lava le mea o le pasia o le mea lea, ae faatoa tatou auiliiliina pe a aumai le Tulafono lea e fuafua e aumai ia Mati.

**FOFOGA FETALAI:** Ia, e pei e faapena foi se fautuaga a le Nofoa, e le tau fautuaina e le matapia le manaia ae o le tofa foi... e leai o le sui usufono o lo o saunoa o se tasi foi o sui usufono sa faapena ona faalagolago ma faamoemoe i ai le tatou faigamalo. Ae i ai le manatu o le tulaga lea, ua na o se suiga o le tatou Faavae i le teuteuga, ina ia sui mai ai le numera i le 51. A o itu lautetele ma itu ogaoga ma anoa o le Tulafono ma le teuteuga lea o lo o mulimuli mai, ma o le faavae foi lea a maea ona tatou talanoaina nei ona tuuina atu le ai le Komiti, masalo foi o le Komiti lea e i ai lau Afioga.

Ae tulai maia le sui usufono, aua e te faafofoga fua i le sui usufono mo Aleipata Itupa i Lalo...

**Afioga Hon FAUMUINA TIATIA FAAOLATANE LIUGA:** Faafetai. O le mea sili o lea ua saunoa le Afioga i le Palemia o lona uiga la, na o le lua itumalo faapalota e faaopoopo lea o le a i ai, ae le tolu. A tamau loa le tolu lea, oti loa Savaii.

**FOFOGA FETALAI:** O lea e le i aumaia le tulaga o le Tulafono na o le Faavae lea e fesui ai numera ina ia talafeagai ma fuainumera e aumai.

**Afioga Hon FAUMUINA TIATIA FAAOLATANE LIUGA:** Lau Afioga e le aoaia e Laupua Tamafaiga, o le Faavae o le tama autu lea, e faatonu e le Faavae tulafono uma tau faaofi i le Palemene. Ma lou faaaloalo lava, faafetai mo le avanoa.

**FOFOGA FETALAI:** Malo faafetai saunoa. Se o le mea tonu lea e tau o le finau faa-toeaiina, ioe. Malo, e le tau laeia pe faafulu i se upu a le Nofoa, e leai o le tofa e faapea ona faalagolago i ai le Maota. Ae talu ai ona o lea ua... masalo e le umi foi se finagalo o le itumalo o Salega. Ua ou vaai atu ua leva ona oli mai lou uso, ia, faapuupuu mai le saunoaga lau Afioga i le sui usufono mo Salega Sasae.

**Tofa OLO FITI AFOA VAAI (Salega Sasae):** Faafetai i lau Afioga i le Fofoga Fetalai. Si tamai teuteuga lava, e le umi foi lava ni nai tuualalo e tusa ai ma le Teuteuga o le tatou Faavae. E talitonu lava lau Afioga i le Fofoga Fetalai, so o se faiga faavae lava po o se Teuteuga po o ni Tulafono e agai i ai le tatou Malo, e pei lava o upu masani, o mea lava e faaleleia atili ai po o ni tulaga e toe faaleleia se mea o lelei po o le toe faaleleia foi o se mea o faaletonu. E faapena la se manatu lau Afioga i le Fofoga Fetalai i le tulaga faapena.

29 IANUARI 2018

**Tulafono Tau Faaofi o Teuteuga o le Faavae 2018**  
**– faitauga faalua**

Na pau lea o le maua atu i le saunoaga a le Afioga i le Palemia i le faatusa o le tatou atunuu i isi atunuu o le lalolagi. E sao lelei le saunoaga a le Afioga i le Palemia. Na o le pau lava lea o le vaega e ese ai tatou, e ese lava Samoa i le tulaga o lana aganuu. E pei o le eseesea lena o lea ou te tilotilo atu i ai. Na o lou toe faatepa lava lau Afioga i le Fofoga Fetalai ma ou toe faamanatu atu i lau Afioga le ivitu o le Tulafono Faavae. Masalo o lena e matamatatetele mai lava i luma o le tatou Faavae i ona upu tomua, o lo o faapea mai lau Afioga i le Fofoga Fetalai, ò le Suafa Paia o le Atua o Le Ona le Malosi uma lava, o Le Alofa e faavavau ua faaalua ai e Taitai o Samoa ma lona Malo Tutoatasi, le faavaeina ai o Samoa i luga o talitonuga faa-Kerisiano, tu ma ana aganuu. O le manino ia o upu tomua na o le Faavae.

Peitai lau Afioga i le Fofoga Fetalai, ia o lea ua maua atu, afai nei e pasia le Teuteuga lea ua taua ai ua suia ai le upu lea itumalo faaalaalafaga agai i itumalo faapalota, ia, ou te talitonu ua le iloa atu ai i ina tu ma aga a Samoa. E pei lava ona tatou i ai i le tofiga o sui usufono, e ao ona e matai, fai sou suafa matai, fai sau monotaga ma mea uma lava. O lea foi tatou te...i saofaiga a Samoa i totonu iinei, o lea lava e sosolo lava i tu ma aganuu a Samoa e tusa ai ma le Faavae. Ia silasila la lau Afioga i le upu lena faaalaalafaga, o le alaafaga lena e i ina, o nuu, o lo o tau ai i ina paia ma mamalu o nuu ma itumalo, aemaise e o lo o papaaao ma afifio i totonu o na nuu ma na alaafaga, a silasila la lau Afioga o lea e...

**FOFOGA FETALAI:** Se i tulai mai lau Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, pau lava si mea ou te faamanatu i le sui usufono, o le upu lea palota e le o se upu na tatou fausia nei, o le upu lava foi na tuu i ai e o tatou tuua lea e talanoa i mea na lea e te aumaia. Ae manatua foi, e i ai tu ma aga i fafo o lea ua tatou tauavea o se vaega o tu ma aganuu a Samoa. E pei la o le palota, sa le faapena tatou, a o lea la ua tatou tauavea nei, ua avea o se vaega o tatou tu ma a tatou aganuu le palotaina o sui. E le mafai la ona e toe foi i tua ma e faapea o se mea ese le mea lea. A mea ese o lea e tatou te faia? E oo lava foi i faaiuga e fai i totonu o le Maota lenei, e le o ni mea na tatou faia nei, o mea lava na fai mai e o tatou tuua na faavae le Faavae lea.

Lau Afioga i le Fofoga Fetalai na o sina faasaoga, na ou faapea o se mea fou a o lea ou te vaai atu o mea tuai lava.

**FOFOGA FETALAI:** Ia alofa le sui usufono, sa ou tau pipii atu lava e faasaoina le taimi, aua e le mafai ona tuulafoaiina e le Malo le tulaga o oulua finagalo faaalua, ia e tonu lava ma sao lo lua finagalo.

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

Ae faamalulu atu, o lou lava lea finagalo ae ese lava le faauigaina a le Malo ia e agaga lava i le palota, aua o le palota o le Samoa sa saili i le tofa foi lea e le i palotaina, ia ua tatou o i mea a papalagi o le palota, ia tatou o ia leaga o le mea lena o lea e tatou te faia tatou te o i le palota. E faamalie atu i le sui usufono, tulai mai e faaiu mai lau saunoaga.

**Tofa OLO FITI AFOA VAAI:** Faafetai i lau Afioga, a lea ua manino lelei i lau saunoaga. O faiga ia o le aganuu a Samoa e saili i le tofa, e leai ni palota o palota o mea a papalagi. O le ala foi lena o lea ou te tau soso atu ai ma le agaga faaloalo, i le tulaga o le solia o upu tomua o le Faavae lenei. Ui o lea lau Afioga i le Fofoga Fetalai....

**FOFOGA FETALAI:** Se i toe tuu atu le avanoa i le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, aveese upu ia o le solia o upu tomua o le Faavae, afai la na e solia, o lona uiga la, sa le tatau ona pasia le Faavae lena e o tatou tuua. Ae na ala ona latou pasia ona ua latou ave le palota o se vaega mai fafo o tatou tu ma agaifanua, lea la na faavae ai. E le i faatoa fai nei le palota ina ua faatoa tatou omai, na fai mai lava palota i le amataga.

Lau Afioga i le Fofoga Fetalai, ua lava lena. E leai lava se mea fou o saunoa mai i ai le sui usufono o mea tuai lava.

**FOFOGA FETALAI:** Ia malie ia le sui usufono ioe, se soia ia e te faataumatatao i le finagalo o le Malo o lea ua see lo tatou vaa, o le palota e saili ai le amiotonu.

Ia faaiu maia le saunoaga.

**Tofa OLO FITI AFOA VAAI:** E faamalulu atu i lau Afioga i le Fofoga Fetalai, leai e le o faataumatatao o lea e fesoasoani atu i mea fou ia ua fai mai nei ia ona fou atu foi lea o sa matou faamatalaga. Ui o lea, ia o le a taoto le itu lena o lea e faafofoga mai le atunuu i se vaivaiga o Salega.

Lua lau Afioga e faauma atu ai so matou manatu. Se sa i ai lava le manatu o lenei itumalo o Salega Sasae, e aumai ma se teuteuga o le Faavae e faamanino ai ituaiga tagatanuu aua o lea e aiga i faiga palota mea nei, e aumai ai se teuteuga i tagatanuu Samoa lea e agavaa i le tofi sui usufono. Aua o le taimi lenei lau Afioga i le Fofoga Fetalai, e le na ma le laina, ua tele sui o isi atunuu ua matai ua agavaa foi latou, ua tagatanuu Samoa sa tatau ona aumai se.....na o le talosaga, leaga e aiga i mea ia, faamolemole aumai se talosaga ina ia faamanino mai, po o le a le ituaiga tagatanuu e agavaa i i le Tulafono?

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

**FOFOGA FETALAI:** E manatua foi le sui usufono mamalu e tulai mai foi le Malo e faamanino lena, e na ona faamanatu atu i lau Afioga i le sui usufono mamalu, ia o lo o mulimuli mai ia le autu o le Tulafono e faamatalaina mai ai le tulaga atoa lea pei ona atugalu i ai lou finagalo, ae sao lou finagalo. Ina ne i te i ua tatou vave tagofia le tulaga lea, a o lea e pei ona saunoa manino le Taitai o le Malo, o le isi a tatou fonotaga lea o le a sosoo ai nei, o le a outou silasila o le a faataoto mai i luma o le Palemene ia le tulaga atoa lea e pei ona maua i le saunoaga a lau Afioga.

Tulai mai le sui usufono e faaii mai lau saunoaga.

**Tofa OLO FITI AFOA VAAI:** Lau Afioga i le Fofoga Fetalai ma le agaga faaaloalo, leai e ala ona ou tautala i le vaega lea ona o lo o i ai i le fuaiupu 45 o le Faavae, lea e manino mai ia agavaa po o e saofia mai totonu o le Palemene, ia pei o le mau lena na avatu, semamanu lea ua i ai le tatou 2/3, aua e tatou te le iloa pe tatou te toe maua se isi tatou 2/3 i le lumanai e tatou te silasila mamao ai i le lumanai. Aua pei ona ou fai atu, toatele ia o tagata mai fafo o lea ua tagatanuu Samoa ua agavaa ua faamatai foi e nisi o tatou nuu ma alaafaga, e amata mai lava i le Afioga i le Palemia le faamatai o si toeaina Saina foi lea, ia ua agavaa foi lena toeaina foi ia e tauva i i le faiga palota e sau e fai ma sui usufono o le Palemene....

**FOFOGA FETALAI:** Se i tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e leai la e le agavaa ia si alii lena, o lena e maioio lelei e ese le ituaiga matai la e ave i ai. O le mea foi lena e uma loa ona faamatai ave loa i ai ma lona tusi tofiga, aua foi e le o ni matai e aafia i a tatou Tulafono o Matai o le Atunuu. Ua aoga foi lenei mea ua ou faamalamalama atu ai ia Salega mea sa nofo pogisa ai o le matua....o lenei o le fa, lima, ono, fitu, o lenei o le a agai i le fa tausaga o e fealuai ma lena avega mamafa ia te oe, ana e vave tau maia ia te au i fafo ua faamamaavega atu e sese le mea lena e te fealuai ma oe?

**Tofa OLO FITI AFOA VAAI:** Lau Afioga, e faamalulu atu, o lea e sao lava mea ia ou te fealuai ma au, ae e pei o tulaga na.

O lea ua saunoa manino foi le Afioga i le Palemia e eseese ituaiga matai, i le silasila faale-Tulafono i i mea nei o matai, faamolemole, ia faamanino la ma faamaoti lelei, o matai moni, ia ma au matai pepelo ia sa fai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, aveese upu ia, e le migao, aemaise o nisi o latou nei mai fafo, o tagata mamalu. E matua le migao lava upu ia, se i soloiaese ma a tatou Faamaumauga. Na o le tagata lava le migao e na te faia upu ia i totonu o le Maota.

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

**FOFOGA FETALAI:** Malo. Ia ona o le tulaga o le tatou.... atonu ona o lea e lavea i tatou Tulafono Tumau i le tulaga o le saunoaga faauigalua ia ma saunoaga foi e limataitaiina ese ai le amiotonu o le faafofoga mai a le atunuu, aemaise foi o felafolafoaiga o tatou o Taitai o le atunuu. E pei lava foi ona tatou silafia, o le tatou faaeaea ia e ave i o tatou uso mai fafo o lo o agalelei mai, ia e le fia manao i se mea faapena, e pau lava le mea o le avatu o le tatou faaeaea e le lava ni a tatou tupe e tau ai lo latou agalelei, ae faaeaea i ai ia ona o lava lea ma...ia e toe foi mai foi e toe agalelei mai i le isi taimi ma le isi taimi ma le isi taimi.

Tulai mai le sui usufono, se ou te ofo se pei lava oe o le isi sui usufono fou nei o le sui usufono ua leva i totonu o le Palemene. Faaiu maia lau saunoaga le sui usufono mo Salega Sasae.

**Susuga Hon Laauli Leuatea Polataivao Fossie Schmidt:** Lau Afioga i le Fofoga Fetalai....

**FOFOGA FETALAI:** Ia e i ai se mea le sui usufono mo Gagaifomauga Nu.3?

**Susuga Hon Laauli Leuatea Polataivao Fossie Schmidt:** Ia o le mea lava e fia faamalamalama ma fia faasao leaga o lea ua saunoa le Afioga i le Palemia, ua saunoa foi le sui usufono mamalu i lona manatu, ona e afaina foi finagalo ona o la e faalogologo mai aiga ma le itumalo sa faatinoina ai le faafotutupu ma le faafotu lea o le vaaalii. O le faasaoga lau Afioga, e le o se mea faaoleole po o se mea pepelo na faatino. O le nofo lea e taua i le alii Saina lea, o le faatumutumuga o lo tatou Malo Afaatasi, Ban Ki-Moon, o le tofa a le Afioga i le Palemia ua manatu le Aiga Sa Tupua o le tofa lea a Samoa, na mafua ai ona to le matupalapala e ave le matai Tupua e matai ai le Faauluuluga o le Malo Afaatasi. Na usu le nuu fai tulaga mamalu e pei ona masani ai Samoa i ona paia ma ona mamalu faafotu le vaaalii ma faaee papa o Tupua.

O le ala lea lau Afioga ua ou tulai leaga o la e faalogologo mai le aiga ma le itumalo, e le o se mea faapaole, ae manatu o tulaga matai lea, mo honorary title, e ave lava le faaaloalo i tulaga faava o le Malo, a o le mamalu e tumau, a o lea foi e puipuia le finagalo o le sui usufono, e le aafia matai ia i a tatou faiga filifiliga. O le ala lea o lou tulai atu e faamalamalama lau Afioga i le Fofoga Fetalai, ina ne i valetuulima pe agaleagaina, e le o ni mea pepelo na fai, o le matai aloaia o le atunuu.

**FOFOGA FETALAI:** Faafetai. Ia se i tulai mai le sui usufono o Salega Sasae.

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

**Tofa OLO FITI AFOA VAAI:** Faafetai. E le taua ia te au po o a tulaga, ae taua ia te au sui e omai i totonu e taitai Samoa i le lumanai. Ma ou te tau atu lava lau Afioga i le Fofoga Fetalai ma le agaga faaaloalo, ou te le manao e oo atu i le isi 20 tausaga ua ese tagata i totonu o le Maota lenei, pe a le faaeteete le faiga o mea nei o suafa matai.

**FOFOGA FETALAI:** Ia malie le sui usufono, se i tulai mai le Afioga i le Palemia.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e le o se taimi muamua lea ua laga ai le mataupu lenei, a o le mataupu e aafia ai le atunuu atoa, e manatua foi sa ou lauga umi ai i totonu o le Maota. A saili saili lava i inei le toatele o tatou o lea e i totonu o le Maota lenei, ia o le tele ia o le au Fiti, au Tonga, ma le au Tokelau ma le au Siamani ma le au Peretania lea e i totonu o le Maota lenei.

Lau Afioga i le Fofoga Fetalai o le mea lena sa ou fautua atu ai i le fiafia o le sui usufono e soona lafo ia upu faapea i totonu o le Maota lenei. A o lena e manino ia tulaga o a tatou faiga palota i aso ua tuanai, a oo loa ina tala gafa o tagata nei e saofafai i totonu i i, ia o le toatele ia o tagata eseese o latou tupuaga a o lea ua ee i ai ia suafa maualuluga o le atunuu.

**FOFOGA FETALAI:** Ia malie ia le sui usufono, e lelei ona faauma mai i lo lou faamutaina o lau saunoaga, leaga ou te le faatagaina foi se saunoaga e sailiili masei i totonu o le Palemene leaga e lagalaga ai le tatou Fonotaga.

Malie le sui usufono faaii mai i lo lou faamutaina o lau saunoaga.

**Tofa OLO FITI AFOA VAAI:** Lau Afioga i le Fofoga Fetalai i le agaga maualalo, e le o saili masei se lauga a Salega, o mea mama ia e avatu ma le loto mama, ma e mamao lo matou tilotilo i le lumanai mo le atunuu lenei. O le mafuaaga lena na avatu ai se manatu. O le isi mea e toe faauma atu ai, ua faaluafesasi sa matou faamatalaga i i i le lumaia o Lipoti lea sa fai ai ia suesuega o le vaevaeina o itumalo, e sao ai le saunoaga a se tasi o sui usufono matou mai Salafai. E fiu lava la e toe lole atu le tama lea ua tuai mai, a o lea ua tamau atu i i, ui o lea, o lena e i ina le uta a le faimea, e avatu lava i le tofa loloto ma le faautaga mamao i lau Afioga i le Palemia ma le aiga Kapeneta ia ma lena itu o lo tatou Malo o lo o taitaia, ia tou te silasila totoa i ai i vaega ia, ma le agaga faaaloalo.

**FOFOGA FETALAI:** Ia masalo ua maea sui usufono sa tuu atu i ai le avanoa. Ia ma e ou te manatu foi e le feifofoiai le faaiuga a le Nofoa....

29 IANUARI 2018

**Tulafono Tau Faaofi o Teuteuga o le Faavae 2018  
– faitauga faalua**

**Afioga FAUMUINA ASI PAULI WAYNE FONG (Itumalo Tu Taulaga Sisifo)** Faamolemole lau Afioga i le Fofoga Fetalai, e faigata ona o lea e aafia le itumalo lenei lau Afioga i le Faavae. Po o le a lou finagalo? To maia lau pule se i taumafai atu se manatu, ma le faaaloalo lava.

**FOFOGA FETALAI:** Malie la le sui usufono, o le a tuu atu nai avanoa pupuu ia e tai lima minute ia te oulua ia o lo o tutulai mai, ne i tuuaia le Nofoa ae o le tulaga lena, e faapea foi....

**Tofa Hon FAASOOTAULOA PATI TAULAPAPA (Gagaemauga Nu.2)** Lau Afioga i le Fofoga Fetalai, o lea foi e fia fai se manatu....

**FOFOGA FETALAI:** O lena na ona ou faamanatu atu aua o le Tulafono lenei e tuuina i le Komiti ia le teuteuga lenei, e 90 aso ona toe aumai ai lea i luma o le Palemene. O lea foi sa outou ioe mai lava i lau fesili atu muamua, po o manino le folasaga le Taitai o le Malo e tusa ai o lana faamalamalamaga e uiga i le Teuteuga o le Faavae, aua e laitiiti lava si vaiiliu lea o lo o fia teuteu o le Faavae, e agai i tua i le Tulafono Autu lea e le o aumaia. Ma o le Tulafono Autu e le o teuteua lava i se tulaga...

**Tofa Hon FAASOOTAULOA PATI TAULAPAPA:** Lau Afioga i le Fofoga Fetalai....

**FOFOGA FETALAI:** Alaala i lalo le sui usufono o lea e fai atu le tala a le Fofoga Fetalai, alaala i lalo le sui usufono.

E teuteu atoa ai le Tulafono, ioe, ia o lea o le a tatou vevesi o lea e le i aumaia ia le ute o lenei Teuteuga na ala ai ona Teuteu le Faavae ia ma le Tulafono. Ia o lona uiga o le a tatou o i le ogasami lea, e tatou te toe o foi i le ogasami lena, ae talu ai ona o le faasaoina o le tatou taimi ma le tatou galuega, o lea lava e i luma le avanoa, e faamalulu atu i sui usufono mamalu, e le o se topelau po o se tulitamoeina o le tatou galuega, ae fua i le taimi e faatino ai a tatou fonotaga e tusa ma a tatou Tulafono Tumau. O lona uiga la a ou toe tuuina atu nei le avanoa, e fia saunoa uma lava sui usufono mamalu, ona ou le iloa lea, po o fea le sui usufono e saunoa e tuu i ai le avanoa, o fea le sui usufono e le tuuina i ai le avanoa, ioe.

O le mea la lea e faamalulu atu, o le a le toe i ai se avanoa e toe tuuina atu i se sui usufono, ona o lenei Tulafono Tau Faaofi o Teuteuga o le Faavae 2018 e alu agai i le Komiti ia ona avanoa sui usufono mamalu o le Palemene....

**Afioga FAUMUINA ASI PAULI WAYNE FONG:** Lau Afioga i le Fofoga Fetalai, ou te usitaia lau Afioga, o le a lava lau faatonuga e fai mai, a o lea na ona talosaga atu lava, tuu mai lava sina avanoa, a le lima minute, faa 2 ma le afa minute lau Afioga ona taumafai atu laia po....



29 IANUARI 2018

**Tulafono Tau Faaofi o Teuteuga o le Tulafono o Kasino ma le Faafoga o Taaloga Tau Tupe Eseeese (Nu.2) 2017 – faitauga faalua**

**FOFOGA FETALAI:** Malie le sui usufono mamalu, talu ai ona e fia saunoa uma sui usufono, ia ae fua i le tulaga o le tatou taimi e ave i tua i le Komiti toe foi mai toe talanoaina, ia ona faapena foi lea ona oo mai ia le Tulafono Autu o lea e mafua ai ona toe teuteu le Faavae, o lea pei ona saunoa le Palemia e sui atoa lava i le luaafe, e le toe tau o se Tulafono o le 1963, o le a suia i le Tulafono o le a suia i le Tulafono o le 2018 ona o le a le toe maua le mea foi lea pei o le fonu o le ta e patch na o mea o pothole ae le suia le fa o le mea.

O le mea la lea, leaga o le a tatou toe foi i tua, ua ou le tausisia foi le Faaiuga a le Fofoga Fetalai, e ui i lea ona o lea tou te tutulai mai, o le mea la lea, ou te faamalulu atu, o le tatou galuega e malu le Fofoga Fetalai ona o le tou lagolago mai, ae mafua ona ou fai atu ona o lea e maua le avanoa i le lumanai. O leni mataupu ou te faatoese ma ou faamalulu atu ai i le paia maualuga i sui usufono e pei ona tulai mai ia aemaise lava le sui usufono mo Itumalo Tu Taulaga i Sisifo e pei ona maitau atu.

*Na faamaonia le lafo ma faitauina le Tulafono Tau Faaofi o Teuteuga o le Faavae 2018 i lona faitauga faalua.*

**FOFOGA FETALAI:** E tusa ai ma Tulafono Tumau, ou te tuuina atu le Tulafono Tau Faaofi o le Teuteuga o le Faavae 2018 i le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le iloiloaina ma toe lipoti mai i le Fonu Aoao i le maea ai o le 90 aso mai le aso leni.

Ia manino, e manino lava le anoanoai o nei avanoa, o le mea la lea, ou te faamalulu atu i finagalo o sui usufono mamalu aemaise o le faafofoga mai o le atunuu.

**TULAFONO TAU FAAOFI O TEUTEUGA O LE TULAFONO O KASINO MA LE FAAFOEGA O TAALOGA TAU TUPE ESEESE (NU.2) 2017 – faitauga faalua**

**Afioga Hon LAUTAFI FIO SELAFI PURCELL (Minisita mo Faalapotopotoga Eseeese a le Malo):** Ou te faafetai atu i lau Afioga i le Fofoga Fetalai, faamalo foi le onosai ma le faapalepale i le faafoeina o le tatou Maota nei.

Ou te tulai atu lau Afioga i le Fofoga Fetalai, e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Kasino ma le Faafoga o Taaloga Tau Tupe Eseeese (Nu.2) 2017 i lona faitauga faalua, ma ou te fia tautala faamalamalama i ai.*

*Faalua e le Minisita mo le Soifua Maloloina, Minisita mo Faatoaga, Vaomatua ma Faigafaiva ma le Minisita o Tupe.*

29 IANUARI 2018

**Tulafono Tau Faaofi o Teuteuga o le Tulafono o Kasino ma le Faafoega o Taaloga Tau Tupe Esee (Nu.2) 2017 – faitauga faalua**

**Afioga Hon LAUTAFI FIO SELAFI PURCELL:** Faafetai lau Afioga i le Fofoga Fetalai ma le mamalu o le Maota. O le Tulafono lenei e toe teuteu ai le Tulafono Autu o le Faafoeina o Kasino ma Taaloga Tau Tupe i le Tulafono lea 2010, ma o teuteuga nei e faamautu ai nai vaega e le o manino i le Tulafono Autu o lo o i ai nei. E faapitoa lava i le faafoeina o tatou Kasino, o tulaga e pei ona silafia e le Maota o lea sa tatou pasia le Tulafono i le tausaga lea na tea nei mo Taaloga Tau Tupe ma tulaga uma faapena, ae le i lavea ai la le Tulafono lea o le Kasino ona mo le silafia e le mamalu o le Maota, o le Kasino e ese lava lona Tulafono tutoatasi na fai, na fai lava mo le Kasino.

O lea la ua fai le Tulafono lea na fai muamua mo taaloga foi o le Bingo, o Petipetiga ma tulaga faapena, o lea la faatoa aumai Teuteuga o le Tulafono o le Kasino, e faa o tutusa ai e align ai i le Tulafono ua faapena ona tatou pasia. O vaega o le Tulafono lena sa tatou pasia o lea lava ua aumaia i i i le Tulafono lea, e pei o tofiaina o latou nei mo mea o Inspectors, o latou ia o le a o i tua e faatino le pui puiga foi ma vaavaaiga o le Faafoega o Kasino lea o le a tuu foi i lalo o le Matagaluega lea o le Gambling Control Authority, o latou lena, o le teuteuga lea, e tapue ai lo latou malosiaga o le Matagaluega lea e faaleleia ai le latou vaaia o mea nei o Kasino.

O lo o i ai foi i ia le tulaga foi lea o le a aveese mai ai i Malu o le Malo i le latou galuega o lo o i ai nei ae faa-replace e le vaega lea o Inspectors. O lea foi na tatou pasia foi i le Tulafono i le tausaga na tea nei, atoa ai ma le siitia ai foi i luga o tausaga o latou e mafai ona o i totonu o le Kasino, mai le 18 i le 21. Ua toe faamalosi ai i le i ai ia Komisi e tatau ona totogi i ai latou nei o lo o faia Kasino e totogi i le Matagaluega lea tupe maua lea e faasafua atu i tua i faalapotopotoga foi ia e leai ni a latou tupe maua, ae faamoemoe i tupe e avatu i le Matagaluega lea e faafoe ai le latou Matagaluega.

O lo o fia pasia foi le Tulafono Tau Faaofi lenei, ona o lo o i ai ia ni Tulafono Tau Faatonutonu e faamalosi ai le aofai ma tulaga lea i Komisi e tatau ona totogi ae seiloga e pasia le Tulafono lenei ia ona mafai lea ona fai ni Tulafono Faatonutonu po o ni Regulations. E i ai foi isi requirements o lo o i lalo o le Tulafono lava lenei e le faasalaina ai latou o e na fai ia ni a latou faamatalaga pe a oo le mataupu foi lea i se tulaga e fai ni sutesuga ma oo ai i le Tulafono, e i ai ni tagata e fai mai ni faamatalaga e uiga i le moliaga e exempt mai i le aafia i le Tulafono.

O isi mea o lo o aafia i le suiga nei o malosiaga o le Matagaluega e fesiligia ai ia Faletupe ina ia tuuina mai ia ni tala o le tupe a ni kamupani lea e faafoeina Kasino, pe afa i le sao ia tupe maua ia e aumai i le Matagaluega e fua i ai tupe komisi ia e fia maua mai e maua ai tupe a le Matagaluega e faasafua atu i tua i le mamalu o le tatou atunuu. E pei ona fai atu lau Afioga i le Fofoga Fetalai, o le Tulafono lea na tatou pasia i le tausaga lea na tea nei i le faaiuga o le tausaga, e tutusa uma lava ma mea lea e i totonu i i, ae pau lava le mea o lea faatoa teuteu le Tulafono o le Kasino ona e tu ese lava le latou Tulafono a o le auga uma lava lena, na o mea e faalelei ai ia le galueaiina o galuega a le Matagaluega lea o le Gambling Control Authority ina ia manino ma malamalama le latou malosiaga e i lalo o le Tulafono.

29 IANUARI 2018

**Tulafono Tau Faaofi o Teuteuga o le Tulafono o le Faaliliuina o  
Fanua Faale-Aganuu 2017– faitauga faalua**

O le faamalamalama lena lau Afioga e puupuu lava foi pe a silasila totoa i ai ma le faaaloalo.

**FOFOGA FETALAI:** Faafetai, atonu o lea ua manino ia le faapupulaga o le faatinoga o le malosiaga i le tulaga o le faafoega o le taaloga o Kasino. Afai e leai se isi sui usufono e fia saunoa o le a tuuina atu le fesili.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Kasino ma le Faafoega o Taaloga Tau Tupe Eseese (Nu.2) 2017 i lona faitauga faalua.*

**FOFOGA FETALAI:** E tusa ai ma Tulafono Tumau o le a tuuina atu le Tulafono Tau Faaofi i le Komiti o Tupe Maua ma Tupe Totogi mo le iloilo ma toe lipoti mai i le Fono Aoa o le Fonotaga e sosoo ai.

**TULAFONO TAU FAAOFI O TEUTEUGA O LE TULAFONO O LE  
FAALILIUINA O FANUA FAALE-AGANUU 2017  
– faitauga faalua**

**Afioga Hon FIAME NAOMI MATAAFA (Minisita mo Punaoa Faalenatura ma le Siosiomaga):** Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faaliliuina o Fanua Faale-Aganuu 2017 i lona faitauga faalua, ma ou te fia tautala faamalamalama i ai.*

*Faalua e le Minisita mo Pisinisi, Alamanuia ma Leipa, ma le Minisita mo Faatoaga, Vaomatua ma Faigafaiva.*

**FOFOGA FETALAI:** Ma lou faaaloalo ou te tapa lau Afioga i le Sui Palemia po o le Minisita foi e ana lenei Tulafono e tulai mai mo lau saunoaga faamalamalama.

**Afioga Hon FIAME NAOMI MATAAFA:** Lau Afioga i le Fofoga Fetalai ma le mamalu o le Palemene, o lenei Tulafono Tau Faaofi ua aiaia ai ma Teuteuga i le Tulafono o le Faaliliuina o Fanua Faale-Aganuu 1965 po o le Tulafono Autu lea. Ma e lua sini o lenei Teuteuga, -ina ia faamalosia o aiaiga e faasino i le lisiina ma le laiseneina o fanua faale-aganuu, o ma le lona lua o sini, -ina ia faafaigofie le mokesiina o lisi o fanua faale-aganuu.

Lau Afioga i le Fofoga Fetalai ma le mamalu o le Palemene, i le aotelega ua faamoemoe o Teuteuga nei, e faamalosia ai le faatulagana faale-Tulafono ina ia malupuipua le puipuga faale-faavae e tusa o le faaliliuina o fanua faale-aganuu a o faamautinoaina ai faiga o faafoe ai le faaliliuga. O lona uiga, o lisi, laisene ma le mokesiina o lisi o fanua faale-aganuu, ina ia tausisia le Tulafono faavae.

29 IANUARI 2018

**Tulafono Tau Faaofi o Teuteuga o le Tulafono o le Faaliliuina o  
Fanua Faale-Aganuu 2017– faitauga faalua**

O le taunuuga ia siitia ai le tulaga o le soifuaga manuia o tagata e ala i le uunaia, o le faaaogaina o fanua faale-aganuu i tulaga e sili atu i le itu tau tamaoiga e ala i le lisiina, laiseneina ma le mokesiina o lisi o fanua faale-aganuu. O le faamoemoe o lenei Tulafono o le a ala mai ai nisi o manuia mo tagata Samoa.

Lau Afioga i le Fofoga Fetalai, e maitauina pe ua sefulu ma ona tupu nei tausaga talu ona faavae mai ia le Komiti Fauaufutua i mataupu tau fanua faale-aganuu, aemaise i le tuliloaina o le faamoemoe o le Malo, ina ia faaaogaina lenei aseta tele a le atunuu e fai ma ala-oa ma faamanuiaga mo tatou tagata. I lena sefulu tausaga lau Afioga i le Fofoga Fetalai, sa faapena ona faagasolo sailiiliga i le mataupu lava lenei o le faaliliuina o fanua, po o le isi itu o lea tatou te tuliloa o le faamautinoa lea o le puipuia o fanua faale-aganuu.

Ua tele tausaga o faagasolo faatalanoaga ma le atunuu e saili ai so latou finagalo. O lea foi e lausilafia e le Maota lau Afioga i le Fofoga Fetalai ma i tatou uma, i le tele foi o nisi o le atunuu ua faapena ona faaalua so latou finagalo tetee i ia tapenaga a lo tatou Malo. E lata mai nei lea sa fai ai foi le savali tetee i le taulaga ia ma sa taua ai foi le faaoo mai o se sainigalima i totonu o le Palemene e faapena ona faaoo mai ai finagalo o i latou o e sa savavali.

Lau Afioga i le Fofoga Fetalai, o le itu o lo o fia faamamafa o lenei tapenaga, o le tapenaga ua leva ona fuafua mai e le Malo ma saili i ai se finagalo o le atunuu. E tusa ma le 81% o fanua o le tatou atunuu, o fanua faale-aganuu ma i le faitau i le tulaga o tamaoiga ma auala e mafai ona faaaogaina ai fanua po o eleele e faapena ona faatupulaia ai ia le tamaoiga, aemaise o le faamauiina o ni tupe nono sa le mafai, le mafai, le mafai lava, ona talia le faletupe le faaaogaina o fanua faale-aganuu, e faamauiina ai ia ni nogatupe aua atinae. A o lea e nonofo i tatou ma le 81% o eleele po o fanua o Samoa, o lea e i outou aao ma o tatou lima i le pule a matai i aiga, o nuu ma itumalo. O se lui tele lea mo so o se Malo, pe faapefea ona faaaogaina aseta ua foai mai e le Atua lo tatou tofi, e faapena ona faatupu ai lo tatou tamaoiga? O lea la ua sefulu tausaga, lau Afioga i le Fofoga Fetalai ma le mamalu o le Palemene, e aumai pea lava le feau lea, ma ou maua foi le taimi sa faamalamalama ai e le Matagaluega le Tulafono mo outou Afioga, o lea o lo o i ai lava le popolega i la outou faitofa, i lo outou finagalo tainane foi le atunuu, ne i te i lava lo tatou tofi ua faoa. O lea la ua tapena mai ai e le tatou Matagaluega i isi Teuteuga faaopoopo e faamautino atili ai, le puipuia o a tatou fanua faale-aganuu, ae faapea foi ona tatala ai avanoa, e mafai ona mokesi ai o tatou fanua. E faamamafa sa matou faamatalaga i le faiga lea o le mokesi. O lisi ua leva ona fai lisi i totonu o Samoa, o lea e sosolo atu ai foi faamanuiaga mo nisi o aiga, nuu ma afioaga ua faapena ona lisiina atu o latou eleele ma fanua faale-aganuu. O le mokesi, o i o lea sa tuliloa i lenei taumafaiga ua leva ona tapena mai, ina ia mafai ona amanaia e faletupe le mokesiina o fanua faale-aganuu, e faapena ona faamaonia ai nogatupe aemaise mo le atinae o aiga, o pisinisi, le atinae o lo tatou atunuu.

29 IANUARI 2018

**Tulafono Tau Faaofi o Teuteuga o le Tulafono o le Faaliliuina o  
Fanua Faale-Aganuu 2017– faitauga faalua**

O le Tulafono lava ia e tatala ai le mafai ona fai. Ma o lea o lo o aiaia i totonu o le toe Teuteuga lenei puipuiga ma le faamautinoa o le faaaogaina o mokesi. A o le mea moni lava lau Afioga i le Fofoga Fetalai ma le mamalu o le Palemene, o le Tulafono e tatala ai, a o feutagaiga ma faletupe ma Faalapotopotoga o lo o faapena ona mafai ona maua mai ai tupe e atinae ai o tatou aiga o tatou nuu o ekalesia lo tatou Malo, o lea ua tatou see atu i se isi tulaga lea ua amata ona faalatalata mai faletupe e amanaia le mokesiina o fanua faale-aganuu.

Lau Afioga i le Fofoga Fetalai, e le o se Teuteuga tele e pei ona faamatala atu o le toe poupou atili o le faamalositia ma le faamautinoa, le puipuia o tatou fanua faale-aganuu, ina ia le mafia, le mafai lava ona faatau ese atu. O le tatou Tulafono lea ua i outou luma, ma e tatalo atu i lo outou finagalo fetalai, le tofa fetalai ia outou Afioga i alii ma tamaitai sui usufono, o outou e faia faaiuga o le atinae o lo tatou atunuu. E le o se tapenaga na fai ananafi, o le tapenaga ua leva ona faataatia mai ma faapena ona vaavaai ma sailiili, sue le tofa a le atunuu, po o le a la tatou mea e fai i le tatou aseta tele lea o tatou fanua faale-aganuu.

Lau Afioga i le Fofoga Fetalai, o sa matou faamatalaga lea e uiga i le Tulafono toe Teuteu o lo o i le Laulau a Fono a le Palemene. Ia manuia.

**FOFOGA FETALAI:** Malo faafetai saunoa i lau Aafioga i le Minisita e ana le tulafono. O lau Afioga lava lea i le Tamaitai Sui Palemia.

Se i tulai mai lau Afioga i le Palemia.

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga, e toe fono faapipii i le saunoaga matagofie a le Sui Palemia o lo o gafa ma le vaaiga o mataupu nei fita. O le mea sa ou matauina o le faigata ona malamalama tagata i le mataupu lava lenei o le lisi, o le lisi o le fanua. O le fanua o le fanua faale-aganuu, o lo o puipuia i lalo o le faavae e le mafai le mafai ona mamulu, pe faatauina. Ae afai ai loa se lisi i luga o le fanua lea, o le lisi lena o le aseta, e mafai la ona faamauina ai ia se nogatupe mo le vaitaimi o le lisi. Afai e sefulu tausaga o le lisi, a uma loa le sefulu tausaga lena ua mou ese loa le lisi ua le toe aoga, ona foi lava lea o le fanua ia, i le matai e ana le fanua. O le mea lea e masani lava ona nunu ai le toau, e manatu, afai o le lisi e sefulu tausaga, a o lea ua lima tausaga ae le mafai ona totogi e le tagata na fai ai le lisi ia le faletupe a o la lava e taupe ai i le aitalafu. E mafai ona se'i e le faletupe le lisi, na o le lisi. Ona nofo loa lea o le faletupe ma toe faasalalau e ave i se isi e tope le sau e toe faaauau le lisi leaga toe lima tausaga. Aua e uma loa le lima tausaga uma loa le ola o le lisi, ona toe foi lava lea o le fanua a o la e tau maua atu ai se tupe a le faletupe e togitogi ai nogatupe. O le mea lena ia manatua lelei, o le lisi e i luga o le fanua, o le taimi e uma ai le lisi e uma ai foi ma le lisi, ona le toe aoga loa lea o le lisi ae toe foi lava le fanua ia i le matai e ana le lisi.

29 IANUARI 2018

**Tulafono Tau Faaofi o Teuteuga o le Tulafono o le Faaliliuina o  
Fanua Faale-Aganuu 2017– faitauga faalua**

Lau Afioga i le Fofoga Fetalai, o le vailiu lea o lea e masani ona tele ai le nunu o le toau. E i ai le isi nuu e i ai le lisi, e le i leva, luasefulu tausaga e fai ai le pa pato ma toto ai ia kapisia a latou e lisiina. Ona totogi atu lea o le lisi a le aiga lea, ona avane lea faasoa i le nuu, ave le isi vaega a matai, ave le isi vaega a taulelea, avane foi le vaega a faletua ma tausii, ave le vaega a le aualuma, ave foi le isi seleni a le faifeau. E fai le toonai a le aiga i le Aso Sa, faasoa uma lava i matafale la latou lisi. E faigofie lava, a fai faapea, ailoga e toe i ai se isi e toe ita i le lisi o lea e manuia uma le nuu atoa, aemaise o le moomia o le malosi o le pulega a alii ma faipule e faamalumalu i le lisi ma le faagaioioia, aua e fai lava i tausaga uma. O lona uiga, e fai lava i tausaga uma le feiloaiga a le aiga ma le nuu ma ave lava i ai nai a latou seleni ona manuia ai uma lava lea nuu. Lau Afioga i le Fofoga Fetalai, o le manaia ia o le ituaiga model lena nai lo le mea lea o le fetui ai, uma ifo ua le alu atu le manuia sa tataua ona alu atu i le nuu.

E i ai isi afioaga na mua i malae e pei o le afioaga i le Afioga ia Laauli, o le taua ia foi o lena lisi tetele sa fai, e manuia ai lava le itumalo. Lau Afioga i le Fofoga Fetalai, o si au faaopoopo atu lea i le vailiu lea o le lisi. E masani ona le malamalama ai tagata po o le mokesi o le lisi. A uma lava le taimi o le lisi uma e le toe aoga, toe foi le fanua i le aiga.

**FOFOGA FETALAI:** Malo faafetai. O lea ua olioli mai le saunoa a le sui usufono mo Gagaifomauga Nu 3. Tulai mai le sui usufono mamalu.

**Susuga Hon LAAULI LEUATEA POLATAIVAO FOSSIE SCHMIDT:** Faafetai i lau Afioga i le Fofoga Fetalai, e fia avatu foi se sao o lena itumalo e ala i le taua ma le faautautaga tataua a lau Afioga i le Palemia ma le Kapeneta aemaise lau Afioga i le Minisita e a ia le Tulafono, ona o se tasi o Tulafono ma Teuteuga taua ua faatulai mai. O lea ua saunoa le Afioga i le Tamaitai Minisita leaga e le o lilo le tulaga o finagalo o lo tatou atunuu. E taua loa mea nei o fanua, ona le nofo lelei lea o le tata o le fatu. E te faalogo atu e le toa lelei lau faalogo leaga e taua, o le tofi. O le ala foi lea o le tumutumu o le tatou Faamasinoga o Fanua ma Suafa i Mulinuu, ia ona o le fatu lea o le tatou atunuu. O le tofi, o Fanua ma Suafa o le atunuu. Ae peitai e tele lava sina mataupu e tataua ona faamalalama, ae momoli ai le agaga faafetai i lau Afioga i le Minisita o lea ua aumai Teuteuga nei, atonu o i e maua ai le toomaga i nisi foi o finagalo o lo tatou atunuu, o lo o momoli mai, e faaali mai foi lo latou interpretation ona tulai mai lea ua le maua e le mamalu o le atunuu, ma nuu ma afioaga po o fea e talitonu i ai, po o fea foi le faauigaina o le Tulafono e agai i ai le talitonuga ma le manulauti o lo o taumafai i ai lo tatou Malo.

Ae ua ou tulai lava e tamua atu faamatalaga, ona o lena itumalo o se itumalo tele ona eleele ia Samoa, masalo o le Gagaifomauga Nu.3 is the biggest land owner in the nation. E ova atu i le onosefulu i le fitusefulu afe eka le tele o ona eleele. Ma o le vaomatua mulimuli lava lea na totoe i lo tatou atunuu.

29 IANUARI 2018

**Tulafono Tau Faaofi o Teuteuga o le Tulafono o le Faaliliuina o  
Fanua Faale-Aganuu 2017– faitauga faalua**

O le tausaga 1960, 1970 na omai ai lea o le Kamupani tele mai Amerika o le Potlatch ma tipi uma laau sa i ai ma ave aua le taumafaiga foi o le atinae o Samoa i lenei taimi. O le taimi lenei, e laitiiti lava si mea la e totoe, masalo po o le 10,000eka o lo o totoe, o lo o matou toe taumafai nei le atinae o le toe toto o le tatou vaomatua e puipuia ai ina ua faamalosia le siosiomaga o si o tatou atunuu. Ma le talitonuga i polokalame ia faagasolo, ia fai pea le galuega o le toe toto uma o le vaomatua, ia toe opo uma le 60, 70eka lea sa i ai o lea matou te umiaina, e amata mai lava i lo matou nuu i Aopo, Letui, Sasina ma Fagaae se i tau mai i le Faletagaloa, o le agaga atoa lena. Ae peitai, ina ua faatulai mai le tulaga o le atinaeina o le Tulafono lenei, na matou maitau ai i le isi itu, e uma le lagi ma le lalolagi lenei e le mafai ona matou faaumaina le faaaogaina o fanua nei. E tele ma anoanoai le vaomatua ua uma ona taina, o le a le isi a matou mea o le a toe fai? Na mafaufau ai ma ae le tofa le faautautaga i le itumalo, talatalanoa pe faapefea ona faaoga fanua nei. O le tausaga e 2008, na omai ai nisi o faipisinisi commercial investors i totonu o si o matou itumalo, ua faamatala mai la latou auaunaga ma mea o lo o mananao e fai. O le fausia lea o se faletalimalo, e faaoga ai le 600eka, e le i faigofie foi le tulaga i le faafesoaina ma le faaaliga o le tofa, leaga o mea muamua ia faatoa amata ona o mai i le atunuu. Ae peitai, na tapenapena pea le tofa ma le faautautaga a le nuu, i le auala e sili ona taua e tapena ai le atinae lenei, ina ne i te i, ua matou manumanu ma manatu, ai nisi o ia o lea ua agai mai i le upega i nei augatupulaga.

Ona o le nuu nei e faigofie, e tasi lava le pule o fanua, tulou lava le tulaga i le paia i Aiga ma Saeseese ma lea itu o lo tatou nuu, le Aiga o Mavaega. A o tai i le Faletolu lea ia Sa Tupua ma Sa Malietoa, e tasi lava le pule. Ua i ai fanua faatulaga mo aiga taitasi ma le mea ua o i ai la latou auauna ma le tautuaina o nuu. A o le lautele o le vaomatua, o Aiga ma le Faletolu. Na manatunatu ai ma faigofie le amataga o la matou lisi lea, na matou tatalo mai ai i le Malo, i le vaitaimi o seei le Afioga i le sui usufono mo Palauli le Falefa, na ou tuitui i ai i le faitotoa. O matou lea ua manatunatu e faatino le atinae lea ua o matou talitonuina, o le atinae lea o le a maua ai le tamaoiga o si o matou itumalo. Na talia aloaia e le Malo ma amata ai loa le tau fatufatuga o le lisiina atu o le 600eka lea.

Le paia e ma le mamalu o le Maota, o lea o le a savali i le sefulu tausaga o fai le lisi lenei. E le faigofie i si tamaloa lea na sau, leaga e le i faigofie tuutuuga na tuu i ai e le itumalo lenei. O tuutuuga tonu lava lea o lea ua aumai i le Teuteuga o le Faavae lea, o lea ua aumai la tatou Tulafono. Na matou ave uma i ai aiaiga a le itumalo. Muamua, aua ne i faigaluega i le Aso Sa. Lua, vaai laei o tagata turisi o le a o mai e faaoga le faletalimalo lenei. Tolu, aua ne i faaletonu le totogiina o le lisi. Fa, ia faafaigaluega tagata o le itumalo ma ia manuia le itumalo ma Salafai atoa.

29 IANUARI 2018

**Tulafono Tau Faaofi o Teuteuga o le Tulafono o le Faaliliuina o  
Fanua Faale-Aganuu 2017– faitauga faalua**

O le lisi e US\$120,000, i le 600eka lea i le tausaga. A faaliliu i le tupe Samoa i le taimi lenei, e \$300,000 i le tausaga e maua e le itumalo. E le faapea la na o le matou itumalo e manuia i le lisi lenei. E manuia ai foi le Malo, e maua le 5% a lo tatou Malo e tipiina ese ona o le tulaga o le lisi ma le faamanuiaga e alu. O le tupe uma, e foi uma i le aao o le itumalo, ona avatu lea fai la latou polo faasoa. E taotaoama lava i tulaga faale-Ekalesia, e aveese lava le sefuluai, o le 10% e ave i le Atua, ia ona tufatufa uma i faafeagaiga. E leai se faafeagaiga o le itumalo e le i lalo ifo o le \$5,000 lana tupe, e tufa i tausaga uma lava. O le tupe e totoe, ona faaagaga lea i le Faletolu lea, e faavasega uma ai ma fetuunai a latou atinae mai lea tausaga mai lea tausaga. O le tautinoga lena le paia ma le mamalu mo le faafofogaaga a le Maota. O se itu sili ona taua, ina ia silafia e tagata ona o lea e tele le fenumiai.

O le isi a matou aiaiga malosi na ave i le faatofalaiga a le Kamupani ma le nuu, e sa, sa ona latou mokesiina le fanua lea. Na fai lava e matou. O lona uiga, o le pule i le faamokesiina e sau lava mai le nuu, ona o popolega ma atugaluga ia e i ai nisi foi o finagalo o lo tatou atunuu. O tulaga na sa puipui tele ai ma ia i ai le malupuipua e pei ona i ai finagalo o manatu ma lagona o nisi o lo tatou atunuu. O le tautinoga lena a le itumalo lenei, o lea ua sefulu tausaga, \$120,000 ia faatele ane le tupe. E ui ina fita ma faigata si alii lea investor lea matou te feagai, ae o lo o i ai pea le tupe o lo o teu a le itumalo e faaagaga ina ia foia pea, ma agai ina ia faamalieina le totogiina o le lisi.

O le tausaga lea na tea nei lau Afioga i le Fofoga Fetalai, na toe saina ai foi le isi a matou lisi, 500eka i se tasi foi o Kamupani na sau mai fafo, e faaaogaina le 500eka i tulaga tau faatoaga, e toto ai le laau lea o le nonu. O le faatoaga tele ua uma ona faatulaga, e faafetai atu ai i lau Afioga i le Minisita ona o le faatalauala atu a lenei itumalo, ina ia fai le faatoaga nonu ma le talitonu. O le atinae lenei ua leva foi ona taupule mai, ma ona o nisi o tulaga e pei ona outou silafia faafaamasinoga, na poloka ai. Ae peitai ua faamalieina tulaga o le tausaga na tea nei, ua taunuu ai ua sainia le lisi ma e 500eka, e US\$100,000 le tupe a lo matou nuu o lea e maua ai. E alu lava foi i le faasologa lava lea, a oo i tausaga uma, ona maua foi lea o faamanuiaga a le itumalo ma lo tatou Malo.

Ua ou manatu lau Afioga i le Fofoga Fetalai, leaga o lea e femateai faamea taitai finagalo o le atunuu. E le o maua foi se tulaga sagatonu i le manatu faapea, a nei e mokesi loa fanua nei ma o atu ai lava. A o le tautinoga o lea foi e molimau lou tuafafine le sui a usufono, o le agaga lena o le itumalo lenei. E fai ma faaoga resources e le o mafai ona faaaogaina. Ma ua uma foi ona fai le manulauti o le itumalo o le auala lava lea e tasi. A o le tiute o au nei o le sui usufono, o le alu e sue mai investor e faaoga eleele ia, ma le talitonuga, pau lea o le auala e mafai ai ona maua le atinae manuia o le itumalo, atoa ai foi ma le faaaogaina o eleele e le o mafai ona faaaogaina. O le faamalamalama lea i lau Afioga ina ia silafia ma manino i le Maota.



29 IANUARI 2018

**Tulafono Tau Faaofi o Teuteuga o le Tulafono o le Faaliliuina o  
Fanua Faale-Aganuu 2017– faitauga faalua**

O le tautinoga a le itumalo lenei, e leai lava se mea e tasi e faapopoleina ai le mamalu o le atunuu, i le faamatalaga lea e alu aua ua le tasi le lua. Ua i luga o faamatalaga ma pepa ma mea uma. Ou te talitonu afai tatou te nofonofa e omai lava isi tagata investor faapenei o i isi atunuu, ona le maua lea e tatou o faamanuiaga. A o le tautalaga ma le faamatalaga i lau Afioga i le Fofoga Fetalai, ou te tautino atu ma lou agaga faaaloalo, ou te faafetai. Vaai foi i le Tulafono lea ua aumai, e le mafai, le mafai ona alu le tagata e toe lisi faalua, e tasi lava le taimi e lisi ai. O lona lua, o lea ua aumai le faatagana e le mafai ona faia se lisi e aunoa ma le ioega o le tagata e ona le fanua. O le ala lea lau Afioga i le Fofoga Fetalai i le faatulai mai o le Teuteuga, ua matua atili ai ona malupuipua le puipuga o tatou fanua nai lo le mea sa i ai muamua.

O si a matou tuualalo lea ma le faamanatu. Ia manuia le tatou Fonotaga.

**FOFOGA FETALAI:** Faafetai. O le matua 120% le saunoaga a le sui usufono mamalu, e faamalamalama atili ai, leaga o lea ua e mua i malae i le talisiina o ou eleele tetele. O lea la ua faafofoga tapuai mai Samoa i le mea o lo o fenumiai ai nei le malamalama ma le 1 fia malamalama, ae o lea ua faatino e Gagaifomauga Nu.3. Malo faafetai, o lo o faafofoga tapuai Samoa, o lea ua manino auofala i le taua o lenei foi Tulafono ua tuuina mai e le Malo i le Palemene.

Ia ailoga e i ai se isi sui usufono e toe fia saunoa o lea ua manino le folasaga. Ae o le a tuu atu loa le fesili.

**Afioga PAU SEFO TAUMATA PAU (Faasaleleaga Nu.3):** Lau Afioga i le Fofoga Fetalai .

**FOFOGA FETALAI:** Ua lelei, e tataua ona saunoa le sui usufono mo Faasaleleaga Nu.2, e pei ona tulai mai faapea foi le sui usufono mo Vaimauga Sasae.

Ae ona o lea ua tatou taunuu i la tatou malologa o le taimi e manava ai la tatou galuega. O le a maua le avanoa i le aso fono aupito sili ona lata mai, ia ona tuuina atu loa lea o le avanoa e malele ma saunoa mai sui usufono mamalu e pei ona tulai mai, mo le fia saunoa e tusa ai ma la tatou Tulafono lenei.

Ae faamalulu atu i lua Afioga i sui usufono mamalu, ona o lea ua tatou toai taunuu i la tatou malologa ma le taimi e faamuta ai la tatou galuega i lenei aso.

Ae tatou te le i tolopo, ou te tapa le sui usufono mo Vaimauga i Sasae na te faaiiina la tatou Fonotaga i se tatalo.

***Na tolopo le Fono Aoao i le itula e 12:57 i le aoauli seia aulia le Aso Lua, 20 Mati 2018.***